

敬業堂詩集

函一

十

冊

敬業堂詩集卷四十一

海寧 查慎行 悔餘

待放集

起癸巳正月盡六月

移疾經年遲遲去國恭遇 聖天子萬壽之期既

隨班朝賀復申前請又三閱月始蒙 恩允歸古

人以道去國者待放于郊得玦乃去春秋公羊傳

則謂大夫已去三年待放噫母乃太濡滯乎得玦

而去斯可矣

韓幹放馬圖次東坡題李伯時所藏韓幹馬七

言古詩韵

圖為同年薄勺庭所藏絹本無款  
孫少宰北海題其後謂是韓幹筆

一如鶴啄長鬣垂 一如狼顧尾撒絲 其一昂頭立而嘶

欲前不前耳卓錫眼中空濶視八極跼步尺咫胡由馳  
薄言垆者在垆野絡腦且脫黃金羈人間皂櫪或老病  
天上閑廐誰權竒攻駒考牧兩無預造物一聽相雄雌  
園官大得閒放意轂鯨遑問牛何之吁嗟乎隙中過景  
越千載畫月畫骨空毛皮東川清絲况寸裂縱復神駿  
疇能知斯圖即謂曹霸可弟子未必賢于師

今年擬不作詩復爲友人牽率破戒口占自解  
年來百事多頽廢何必於詩苦用心正爾苦心誰復識  
堯夫自有打乖吟

院長湯西厓前輩出示與副相揆公贈荅詩索  
余次和六首

皇華候騎走駢駢万里還  
朝倡和新何物堪持比詩

境冰壺玉鑑兩無塵

好士重聞六館開中間一館是翹材  
春風入座人人愛  
只待先生下旨回

第七車中博物餘承明  
顧問在星廬不知三篋三倉外  
可有平生未見書

白楊巷與青楊巷多少車前騶唱聲  
何似神仙雙學士

對騎官馬出郊行  
時揆公以副相兼掌院故得並稱學士

文壇宿望與資深吟徧西垣又苑林  
三十年來同調盡

却從少和識孤音  
後漢書孔融傳贊越俗易驚孤音少和

翩翩和鳴屬兩公  
卷阿風入雅音中  
枯桐入爨還邀賞

草木終憐臭味同

題徐去矜侍御日南種菜圖

不費園官送渾疑老圃家苗民分七箸童子劬烟霞飽  
喫三年菜閒看四季花還朝無俗物堪作畫圖誇

癸巳仲春上丁文廟分獻紀事四首

森森老檜上叅天路入橋門氣肅然齋宿忝隨丞相後

先一日隨太倉相國省牲閱祭品趨蹌獲在聖人前元音唱歎餘琴瑟

古器駢羅識几筵兩度春秋遞分獻一門兄弟儼差肩

去秋丁祭家弟嗣禩與分獻之列

鸞縑翟羽互飛翔樂舞同時綴兩行道在羹墻榮北面

禮成盟薦屬東廂千秋世裔綿吳國

言子薦封吳侯其裔孫德堅去冬始

襲經博

十哲新躋列紫陽

朱子去春躋十哲配享廟堂以上兩賢余分獻之位

在焉到

此始知儒者貴遥遥今古幾升堂

自堂徂廡又趨階升降循環往復迴想像軒懸非一代

摩挲石鼓已三回

二十年前為博士弟子十年前釋褐

頭銜分

去聲

出資郎

下班次猶煩博士陪

宋祥符中孫奭上言釋奠舊禮以祭酒司業博士三獻新禮以三公

近歲止命獻官三員兼拜請備差太尉太常光祿卿三獻詔可今至聖前則大學士行禮十哲分獻用翰林資

深者二員本監丞博士二員猶隨分獻官後蓋參用宋時新舊禮也

絕勝恢諧飢曼倩

殿庭割肉早歸來

題名釋褐幾何時衰至人嫌拜起遲

莫年時余拜起稍遲以致敬也導引

官遽相催迫故云

位定瞽宗寧敢讓

致齋所序坐分獻官在太常卿之上

事關籩

豆豈無司明朝尚舉分膳禮他日誰陳齒冑儀白首詞

臣稽掌故 盛朝文物古為師

二月二十日雷雨之後忽復嚴寒枕上口占

老子慵貪臥家童起報晴朝來冰復合昨夜蟄初驚寒  
暖渾難定陰陽動必爭庭花經手種榮悴也關情

後二日雪

欣欣逢歲閏靄靄及春陽早是經雷雨如何更雪霜天  
心寧好殺物性自多傷草木如知候勾尖幸宛藏

出史記  
律書

恭祝

皇上萬壽詩四章

鳳紀龍飛五十年周天景運正中天衆星拱極雲霄上  
萬國瞻光日月前難老祥徵 仁者壽誕生 聖在佛

之先欲知 帝力占毗俗擊壤吹幽徧八埏

爐香馥馥護 楓宸花甲循環曆象新 玉燭万年三

月節 鴻鈞一氣四時春闢門 典曠收群士 錫福

疇多及庶民黎老祝 釐還自賀兒孫同作太平人

厚澤深仁物物霑筭從動植到飛潛日昃風動 恩威

並 秉鉞垂衣創守蕪久運 乾行神倍王 屢辭尊

號德彌謙太和宇宙無疆慶長願春隨閏歲添

極盛 皇猷冠古今無涯 聖學仰高深已隆咸五登

三業猶塵 堯咨舜做心 天大固知難繪畫人歡爭

欲效謳吟小臣拜手情尤切十載蒙 恩在禁林

題石門勞鈞天日邊鼓篋圖二首



文賦行當擬陸機

鈞天年甫二十故引用少陵詩中事

暫從鼓篋別庭闈

同朝幾輩來相問五十年前父執稀

尊甫中丞公甲辰進士至是恰五十年

過庭家學本傳詩都講風流又一時三百諸生多避席

愛聽匡說解人願

山野老人遠來祝

萬壽者以千計目覩盛事

紀之以詩

長世人多壽親承異數加使年踰甲子問俗及桑麻跪

進觴

停輦歸簪帽有花賜醕還賜杖好向後生誇

雨後過自怡園看海棠同院長作時余復請假

不記名園裏搴芳醉幾回偶逢新雨過又報海棠開此

地嗟春晚當時見手栽勿辭燒燭看爲是別花來

香山詩七

十三翁難再到今春來是別花來

### 四月朔大雪

大雪灑庭柯春光九十過急催花落盡亂雜絮飛多燕壘融還凍鶯吭噤不歌紛紛蜂與蝶爭奈苦寒何

### 送同年海天植前輩視學雲南

八千餘里皇華使二十多年侍從臣館閣文章天上草門墻桃李日南春先聲到處苗風變公道傳來士氣伸儘讓同官開府去好持冰鑑答楓宸

重過封氏園飲矮松下偕綱菴湘芷俠君潤木

作

刺蘼花外矮松前，指點遊踪廿四年。  
杖端摩頂透青天，與誰作伴人先老。  
閱世如流我獨憐，賣却朝衫充一醉。  
免教歸欠酒家錢。

再賦古松疊前韵

時聞松子落吾前，小住方知日似年。  
草色展開三丈地，濤聲捲起四垂天。  
最宜物外閑相賞，久在人間絕可憐。  
莫道如龍難畫得，真龍又值幾多錢。

時潤木畫墨松旁觀有譽樹為龍者

故戲及之

從刺蘼園步至陶然亭

未覺年衰腰脚頑，意行隨步有躋攀。  
雨餘天氣清和候，城角人家墟墓間。  
栢子庭空移白日，荻苗水涸轉蒼灣。

此來直與孤亭別，貪得憑欄一晌閒。

壽山田石硯屏歌副相揆公屬和

吾聞陽精之純韞爲璞白者曰璧黃者琮兼斯二美乃  
在石天遣瓊寶生閩中壽山山前石戶農力田世世兼  
養蜂採花釀蜜自何代金漿玉髓相交融深埋土肉久  
成骨亦如虎魄結自千年松想當欲出未出時其氣貫  
斗如烟虹地亦愛寶惜不得飛上君家几硯爲屏風質  
良材富肌理豐廣袤徑尺加磨礪銀河中傾灑激水灌  
頂倒擢崔嵬峰寒光通透月兩面高勢噴涌雲千重長  
檠夜燒燭焰紅表裏映徹疑中空風林片石非爾比况  
許下巖劣品矜芙蓉朝來得句傳詩筒語雖紀實工形

容平生嗜好一無癖而此特爲情愛鍾吁嗟乎人間尤  
物蓋不乏目所未覩誰能窮公今獲石石遇公無心之  
合欣遭逢深山邃谷只作几硯視要使天下稱良工

循例請封典有作

馳封有例徧簪裾院吏傳宣到敝廬一榻春生衰病後  
九重恩逮罷官初絕無功狀虛縻祿自寫年勞削勘  
書慙愧初階叨進級枉將章服混樵漁

自怡園曉起即事呈副相

朝來雲出岫昨日雨鳴溪杏子落如豆楊花膠作泥新  
巢看燕乳舊耳聽鶯啼

去年四月公有曉  
起聞鶯詩屬和

詩境從閒得

何須苦覓題

獨坐紫藤花下

俗客何由到但聞蜂蝶喧低枝如見就長穗不勝繁稍

重雨欹架忽飛風滿園兀員無處著

東坡詩兀員無處著寄身范公園

來借紫花墩

食新筍

朔野無修竹名園擅辟疆舊皮留虎豹

昌黎筍詩看皮虎豹存

新

角茁牛羊淪取庖厨潔饑生七筋香一餐真過分

梅聖俞謝

韓持國貽筍詩今年得此謂過分不似在他鄉

放船至因曠洲

露氣烟光潑眼青蒹葭影裏見孤亭藕梢過港又生葉

柳絮逐波多化萍鶯語忽流何處去漁歌合向此間聽

老夫大有江湖興官讓閒鷗占一汀

乞長假留別院長揆公二首

北道嚴裝日

院長將扈  
蹕赴口外

西窗剪燭時兩心多戀戀分手

故遲遲欸曲行藏計纏綿倡和詩桑榆收已晚後會恐  
難期

示疾非無疾藏名亦有名難窮惟佛理易足是官情聚  
散人誰免蹉跎我此行半生知己分投老荷相成

雨中發自怡園再呈院長

迴思風雨追隨地多在園居少在城草木因公皆可敬

東坡詩醉翁行樂  
處草木皆可敬

禽魚與我豈無情編年集換新題目

署尾牋留舊姓名從此高吟應寡和更無人繼老門生

附院長作

揆叙

一醉筵前各異程迢迢沙塞與江城欲攀征蓋終無  
計苦挽歸航似不情風雨每思償宿願亭臺還請署  
新名從今裂帛湖邊月長照離人白髮生

車中遇佟陶菴同年

三年不見故人詩一笑多成世外期君自愛閒求退早  
我方移疾得歸遲萍踪浮海相逢地柳絮隨風欲散時  
莫怪下車還久立老來光景怕臨岐

吳寶崖以西苑龍棚詞百首新刻見貽兼索題  
句四首

朝爲百賦暮千詩敏捷曾聞崔立之何似吳郎新樂府



一時紙價貴京師

好譜新聲付樂工半參商調半參宮二千八百驪龍顙  
併入歌珠一串中

員嶠方壺咫尺移太平景物万年期丹青繪出殊難肖

輸與文人絕妙詞

時少司馬宋堅齋奉旨繪圖

他人才少爾才多珥筆差堪上馭姿可惜得官偏落第  
不曾名占百篇科

端陽前二日薄勺庭招諸同年集王園芍藥花  
下

綠陰十里豐臺路來趁名園芍藥期良會轉憐經歲少

自去年以來久不舉同年之會好花偏愛閏年遲江郎一夢才輸錦小

杜三生髯有絲珍重故人尊酒意將歸時節咏將離

酬別陶菴同年六首

出門袞袞怕風塵見面睽違動隔春形跡校疎情校密  
可知俱是嬾朝人

入同珥筆出隨 鑿幾載辛勤共跨鞍今日車中思馬

上 皇恩直似五湖寬

歸期已是一年淹辭祿能無缺乏嫌慙愧故人親致贐  
拜嘉祇恐或傷廉

河梁錄別意如何真有長歌續短歌不待吾言君自信  
傳人一代本無多

段家橋外木蘭舟唱和曾同扈 蹕遊却與歸人添別

恨獨吟怕上望湖樓

君才畢竟爲時用我老長甘與世辭

王右軍有辭世帖

聚散升

沈渾細事人生難得兩相知

題宋蘭暉潯陽送客圖

聊借琵琶寓苦吟多緣淪落望知音後來信有商人婦  
直被香山賺到今

題程蒿亭持竿圖小照

已遮西日向長安尚想臨流把一竿寄語能詩侯叔  
求魚沮洳古來難

晚香長老六十乞詩

紅椒上人年六十世壽從頭數甲乙朝來隱几夢青山

過我殷勤約歸日我今面皺眼昏花師亦瘦如枯木查  
童時觀性依然在同閱恒河無筭沙

陰雨連綿頗似江南黃梅天氣

乍陰乍晴鳩斂巢半濕半乾蚓出土南中五月熟梅天  
北地應呼杏子雨

送蔣樹存出宰餘慶

憶昨領書局群英集金鑿蔣生預校讐臭味吾芝蘭趨  
階或聯步會食恒同餐六時數晨夕三歲離暑寒書成  
上御覽名姓列簡端聚散夫何常如沙孰能搏同儕  
三十輩一一爭彈冠我已病乞身子行方得官不以出  
處易儼然平生歡叩我蓬葦門送迎諒蹒跚谷風有遺

棄責善人情難古義胡足論世途良可歎子今又遠別  
迢遞赴花蠻黔俗我所諳雁戶雜猴獮陰多晴日少霧  
氣昏漫漫長吏雖難爲苗民豈真頑寶輸况無幾期會  
務使寬訟簡案牘稀地遐心跡閒時時弄筆墨哦咏于  
其間亦足以自娛因之報平安好音望頻惠綿邈非關  
山

乞歸候 旨未得成行寓庭雜蒔草花用以遣  
日吟成四首

歸心一以動如馬渴思騁乃復縶維之動中反吾靜于  
焉寓草木幽事閒稍領既栽須有溉生理視俄頃未免  
擾隣家朝朝汲甘井

瓦盆列羣卉紅白非一種經旬排比開含意似矜寵閱  
人成旦暮偷負力何勇取咲桐栢材十年方把拱  
開亦勿德雨謝亦勿怨風榮枯兩適然了不關化工化  
工倘狗物毋乃與物同所以老子懷痴頑若孩童  
京師看花人汲汲需代匱主少十日情市多三倍利方  
從擔頭買旋向墻角棄不念花有根初為悅目地賞新  
宜置舊何用發深喟

次日社集張匠門齋同人皆和余種花詩再疊  
前韻四首

平生數交遊湖海浪馳騁邇來嗜好別取友亦取靜與  
君隣巷居跬步煩引領濶疎輒累月會合或食頃一咲

兩心同無波如古井

君鬚尚鬢鬢我髮已種種引諸同調未推許荷光寵栽  
花坐無慘決去愧不勇焉能久鬱鬱而待宰木拱

草木茁苔穎好詩來清風中有元氣存豈謂屬和工群  
公富揮灑下筆無雷同挹彼山下泉爲余發蒙童

造物閱古今生生本無匱何論材不材固有利不利晚  
容桑榆補蚤恐牙蘖棄願將種花心移作樹人地毋使  
後來者仍滋慨然喟

題王石谷爲張超然畫旌節圖

王畫此圖  
九年始成

張母早喪夫張子幼無父却將歿後榮報荅生前苦有  
鹿不觸墳上松有鼠不穿墻中土天生異類猶多感孰

謂人情不如古王君作畫踰九年此事此圖皆足傳我  
詩豈獨稱子孝亦使後來知母賢

去夏手植盆榴二本今年一枯一榮有感而作  
庭下兩盆榴經春謂已萎其一雨忽生病夫眼雙洗枝  
端抽綠葉葉底粲紅蕊蕊綻復吐花花殘旋結子依然  
還舊觀去聲慰我岑寂裏生存日向榮死者爲薪矣有情  
兼弔賀感歎爲賦此

院長貽嶺南椰子

椰子產番禺瓠垂大如斗其皮堅以鞞既剝且難剖誰  
致越王頭齊民要術云椰子其俗謂之越王頭不脛而北走微凹陷兩目

鑿竅通一口轉側初有聲俄傾半升酒東坡椰子冠詩半升僅漉淵明



酒  
閒吟出既醉義愧餉師友  
梅聖俞謝李獻甫餉柳子  
詩我獨愧先生饌致崇師  
友

### 林鹿原餉武夸茶

頭綱拜賜吾何有細色徒聞馬上誇何法商量好消渴

都籃分得大窠茶

梅聖俞新茶詩大窠  
有壯液所發必奇穎

### 木本金銀花十四韻

本是沿籬蔓今成傍砌栽瘦根形促縮短梗狀堆厖鳥  
爪拳筋立蛇皮換骨來忍冬經凜烈入夏應恢台長乳  
層層發幽花對對開雛鶯飛閃爍小鶴舞瑤璵粉悠  
揚墜蜂鬚颭灑迴金銀分老穉黃白變胚胎最好清含  
露尤宜薄戰雷痛須芟冗葉惜勿剪條枚就影移書案

留香泛酒杯資生無秘術入藥即良材病檢醫方熟閒  
從物性推不貪能識氣衆眼漫相猜

庭西牽牛子新苗競發喜成十韻

手種牽牛子根株粒粒成勾尖看乍破兩葉喜先萌  
長論分寸爲時閱晦明立苗防細弱插竹與扶檠  
遂有纏綿意偏多附麗情疾風從偃仰猛雨賴支撐  
地力隨肥瘠天機示發生幾時花逞艷連日蔓交縈  
寓目聊充玩消閒亦強名料他秋爛熳我已赴歸程

和張日容嘲薜荔二十韻

薜荔爾何物纖微孰比方胡然纏宇下只合繚崖旁  
歧政工緣僻離離巧翬墻性因柔善附地以瘠爲良  
松栢

寧勞施絲蘿故自張龍鱗移不易宋史李彥發物供奉大類朱勗如龍鱗薛荔一本輦致

之費踰數萬蛇蚶斷無傷及見縈根密俄驚引蔓狂嫩

莖繩絞繳大葉羽披猖山鬼依棲暗佛典呼餓鬼為薛荔湘君結

託荒罔帷憐屈宋九歌罔薛荔而為帷靡席咲班揚甘泉賦靡薛荔而為席

雜蕙紉為佩輸荷緝作裳攀枝頻颯影貫藥罕聞香離騷

貫薛荔之落藥好補青藤援休侵白玉堂移文累芳杜北山移文豈可

使芳杜厚頰作賦混蓀萋張衡南都賦草則薛荔蕙若薇蕪蓀萋誰遣臨

書幌兼能罩筆牀有時經雨潤逐日領風涼梢自隣家

放陰留夏景長卷簾交竹翠曳杖點苔蒼大抵詩騷意

多從諷諭將勿嗤吟小草中有好篇章

晚香長老贈桃枝竹杖

六尺桃枝杖將歸荷見投健添居士足高出老僧頭與  
鶴誰先到爲龍寧久留撥開塵土窟遲爾入山遊

同人集棗東書屋分賦二首

春偷桃杏妍夏竊芙蓉艷秋榮雜桂菊冬至亦時歛樂

子之無知多將四時占

月季花

小小黃金花媚人如自獻聊陪今日賞適我他方願衆

醉敢獨醒不勞持盞勸

金盞花

汪陞交郡丞屬題負米讀書圖時將赴任潮州

即以贈別

汪子客京華氣豪心悒快高堂有母在恒結白雲想皇  
天憐斯人得舉甫一上南宮輒唱第盛事快探掌早知

給舍官不及州邑長題輿行佐郡得祿猶逮養潮海万  
里程翩然捧檄往過家拜白髮喜氣春盎盎却憶負米  
時悲喜異今曩平生讀書力篝火依績紡食報理必然  
問言受如響丹青非苟設風義行可廣題作贈行篇披  
圖愜神賞

題故汶州太守潘君畫像

士當未遇時往往慕好爵及乎嬰世網又想田園樂田  
園豈不好世網多被牽興罷乃徑歸斯人得非仙廿年  
客京洛未識斯人面山光竹影中髣髴如相見

送同年劉大山應召赴行在三首

且喜南冠不到頭復趨幄殿侍宸旒恩威天大殊難

測去住身孤可自由沙澗草香知麝過林蹊月黑見螢  
流識途老馬今閒放歷歷從君話舊遊

行行莫慮出關遙司馬臺東景色饒禾黍連塍無棄地  
松杉夾岸有浮橋霜收野果丹砂實雨剪山蔬翡翠苗  
一段閒情知不乏也應問荅到漁樵

弱羽廻翔又一時鍛禽來拂鳳皇池重回蓬島游仙夢  
別擬山莊應制詩眼望青冥行得路心憂白髮見無  
期臨岐直是難爲別二十年來兩故知

畫義

我有古玉器裹諸片青瓏烟如一鈞月映出初三天纖  
纖銳兩頭弓勢未扣弦下連徑寸靶中竅外規園愛惜

徒手摩致用無由緣昨得桃竹杖肌理細且堅命工稍  
斲削冠王于其顛呼之曰畫義古製想當然東坡昔居  
黃剝有掛壁錢持义日取百月費猶三千我今已鐫俸  
仰屋方高眠夫豈有餘資貫穿梁上懸义成等無用一  
笑仍棄捐何如刻作鳩扶我歸農田

題王石谷山水四首

浮嵐暖翠望重重幾道清泉出古松知有僧樓尋不到  
似聞一杵隔雲鐘

水滙山環去復回林端無徑不梯苔石梁果與天台接  
可許人間肉馬來

想當潑墨目無前董巨源流却井然天下溪山皆粉本

空中結構是雲烟

朱瑤晚輩今多少真蹟尤須愛惜看見說山人年八十  
白頭重畫此圖難

留別潤木即次弟送行原韵四首

誰能問舍更求田車自今懸室早懸久病我忘官爵好  
同朝人羨弟兄賢魚隨水退先歸壑鴈逐雲飛尚各天  
時德尹嶺南未歸若是登真須拔宅良常何敢獨爲仙

幾夜連床聽雨聲却教離恨此中生貧思飽煖原竒福  
老戀桑榆亦至情出處多岐非意料去留無累稍身輕  
只愁五十平頭客婚宦何時了尚平弟今年五十矣

指點林廬眺望賒曉隨門鵲暮棲鴉桐爲先世成陰樹



池上梧桐先君子手植二十年前已合抱宋人稱韓子華兄弟為桐樹韓家桂是吾家及第

花吾家廳事前銀桂五株自癸酉以來每逢科詔兄弟子姪輩有獲雋者必發金花一枝為先兆歷歷不爽

屋後籬疎須補竹墻西地瘠想宜茶得歸已乏躬耕力

種植書中課有加

事兄慙愧竟如師至性怡怡實在斯何日始酬偕隱願

向人羞乞買山資夢餘得句憐靈運膝下成名愛阿宜

杜牧與姪阿宜詩連年掇科第若摘領下巵時五姪克紹新舉京兆故云然此外升沈皆分

定吾言雖淺要尋思

留別詩社諸同人次張匠門見送原韵

去住何關此一官衰年只別友朋難烟霄過眼看如霧

草木論心臭比蘭身在夢中誰獨覺事當局外每長歎

是間著我初無謂獅子林中一野干

禪宗語錄有野干隨逐獅子終不成

獅之語

白頭白盡想巢南早署菴名未有菴朝跡已收雙屐在  
歸裝猶累一僮擔高僧瓶鉢原初約老圃桑麻豈腐談  
多謝故交頻戀別尚容諧謔互相參

匠門以瓶蓮十二韵索和次荅

脉脉凌波質朝來帶露攜出筓看蕊綻照眼得花齊長  
養仍資水清幽更洗泥畧教分向背初不競高低欲語  
殊多態何愁白少啼艷將同洛浦愛豈獨濂溪有客尋  
池上無魚戲葉西依稀能忍咲綽約好防迷顧影移秋  
蝶分香夢夕鷺暑颺迎澹澹涼雨避淒淒立傍屏風鷺

談親麈尾犀涉江吾擬采先與報箋題

題吳寶崖荏山讀書圖即送其出宰荏平

無事飲犀首亡何飲袁絲飲之爲功固不細阮能罷哭  
陶忘飢張芝李白大暢此中趣可以狂草可以詩逃名  
混跡靡不取獨於從宦非其宜何況邑宰寄民社設遇  
煩劇尤難爲吾黨吳生性耽酒其人磊砢而英竒今將  
行作吏得縣古名荏有山袞袞東南陞有水雪雪西北  
馳中間曠衍百餘里厨傳四走當衝達似聞齊俗夙健  
訟邦治邦法難兼施書生習氣要一變嗜好勿使旁人  
窺仕而優則學二者恒相資公餘讀書良有味絕勝干  
鍾百榼痛飲誇淋漓勸君可止則徑止未能遽止請損

之贈行實關朋友義吾言雖戲庶可以箴規

諸君爲余作桃枝竹杖歌余亦自賦一首

勞不得及奔馬逸不得乘安車飛不能群衆鳥游不能  
隊潛魚無端人趨我亦趨倉卒一蹶誰當扶七尺之杖  
六尺軀 聖恩寬太容田廬歸與歸與吾與爾俱杖國  
雖不足扶鄉已有餘

苦熱

不辭河朔飲酷暑竟難逃高屋同炊甑輕襦劇緼袍石  
欄乾迸火松柱液流膏嗟爾巢棲者多應厭羽毛

題莊書田笠屐探梅圖

杜家亦有笠謝家亦有屐何必眉山翁區區擬其跡身

挾冰雪骨宵貯冰雪文但遇梅花開入山尋白雲白雲  
舊在題詩處畫裏溪山能久住君今笠屐且閒拋借與  
歸人作遊具

仇山村詩翰一卷乙丑秋於竹垞寓齋見之偕  
故友魏禹平題名其後未幾此卷歸吾鄉高文  
恪公又二十九年癸巳公之孫礪山攜至京師  
屬余題句存歿之感愴然于中聊附數言以志

歲月

四百餘年翰墨新流傳重是宋遺民論詩正爾空當代  
展卷渾如遇故人世閱古今雙轉燭事關存歿一傷神  
先公手澤依然在肯使桓厨賡亂真

題鄭寒村爲魏仿韓畫棲鶴圖二首

鳧雛鴈子影參差，  
筵羽群窺浴鳳池。  
爭及寥天秋一鶴，  
巢松獨占舊高枝。

攜將鄭老一幅畫，  
來索查田七字題。  
我是人間退飛鶴，  
相逢只愛說巖棲。

題泰州宮氏春雨草堂圖

于野去山遙，環城爲水滙。  
草堂築其上，春雨名猶在。  
老木皆十圍，湖黿兀硯磊。  
問君今幾世，物色舊無改。  
正賴後多賢，畫圖益精采。  
鯉魴富罩汕，蝦蛄蕃菹醢。  
樵去唱烏鹽，漁來歌款乃。  
路迷葭岸舟，出蒲蓮海我欲溯。  
回從蒼蒼隔煙靄。

觀蜘蛛布網

小童持竹竿簷角除蛛絲既除旋復吐日事經營爲爾  
網密以張爾腹恒苦飢羽蟲投一目所獲良已微並生  
天壤間動者羅禍機兩皆置得失且復吟吾詩

洗象詞五首和顧俠君

畫鼓聲中緩步來紅旗影裏撇波開都人六月汗如濯  
慣是一年看一回

俸料新加例有無尋常已飽大官芻被他三品閒鷗咲  
出沒成群聽象奴

兩齒齟然臂聳然老于槽櫪浴于川就中云有前朝者

曾見

天家破賊年

相傳李自成僭號登極時象  
有流涕者入本朝馴服如故

角壯浮深去復迴舊鞍重與拂炎埃也應三口同休沐  
辛苦終年立仗來  
衆裏觀場老比丘粗從三喻識沈浮兔迹馬跡紛紛渡  
徹底輸他是截流

題俠君嗽荔第二圖

醴泉甘露吾不知人間絕品惟荔支惜哉遠落閩粵徼  
爲候又與煩蒸期四月則太早七月則太遲佳者熟當  
小暑時闌風伏雨交紛披炎官火傘赫赫曦養成姑射  
仙山肌水丸雪片不受嚼化作涼液沁入人心脾我昔  
遊閩遇歲稔日噉四百五十顆有竒爾來喉吻久枯澁  
北果厭摘頻婆梨故人密漬或遠致四三五枚蒙見貽



色香味三了無取但覺一甘入頰膠如飴十年夢寐西  
禪枝仙蹤縹緲胡可追顧侯好事乃過我閩產粵產兼  
嘗之初嘗得火山名雖曰荔格實卑繼而得挂綠漸入  
佳境方稱奇生綃半幅寫不足擬再乞畫還徵詩今君  
已爲一組縻畫餅說食徒爾爲我歸大作口腹想嶺嶠  
雖遠不過天南垂鷓鴣孔翠成羣飛老夫興發神與馳  
齒牙缺落舌尚在清泉涌穴菽菽先流頤

藏經匣歌

并序

匣漆皮爲之無縫不可開相傳古羅漢寫藏經銅  
其中長三寸許濶二寸許厚不盈寸正面畫佛像  
一尊背及四旁俱有梵書西域喇嘛僅識其半云

此大西天字也彼中奉為法寶流入中國者七部  
四部藏匣內三部藏佛腹中好事者啟視壞其一  
今在人間者尚有六部此其一也佩之水火盜賊  
不能傷魍魎魑魅不能害云中州李庶常牟山出  
以見示成長短句一章

毘勒最初藏三百餘万言後人憶誦少從簡刪其繁餘

存三十八万四千字梵夾秘在菴羅園大論云毘勒藏有三百二十万

言佛在世時所造後人憶誦力少不能廣誦撰為三十八万四千言四十二章經流入震

旦同河源六朝南北洎唐代高僧輩出如雲屯兩伊合

新舊西方有新舊兩伊猶此土之篆隸悉本經義為譯翻後來廣增律

論部與經為輔傳仍昆白馬詎勝馱劫火安能燔云誰

收入方寸篋三藏笑翅千千米相傳阿羅漢恐是須陀  
洄手摹梵天書流布于九垓中國凡七部一部已壞其  
六存六部之中此其一佩此可以安神魂洵若彼所云  
西江一口何難吞吾聞釋迦教率以譬喻論有如須彌  
山納一芥子大海水吸玻黎盆細入無縫大則包乾坤  
撮搏寶掌成胚渾世人自昧真實諦暗鎖白日長昏昏  
疑者以爲無空諸所有胡得焉信者以爲有實諸所無  
非本元語言文字互膠擾證入不二于何門安得霹靂  
手稽首兩足尊鑿開真函破妄見是則名爲報佛恩

咏周尊彝十六韵

形方而隨兩耳四足中有古篆魯公作文王尊彝七字無

銘詞歲月可考

三代多銘識圖從博古援世惟金石壽今覺鼎鐘繁庚子

山文公侯復始鼎鐘逾繁此物傳周器何時入國門問名充象著索

價重瑤琨魯國年無紀姬公典幸存啟封從聖子近裔

屬文孫大祀新宮煥東藩古制敦少陵詩宗百邊偕簠

簋五獻設彛樽螭虎形差肖夔踞勢若蹲比劍安足穩

似鬲取唇反平叶上聳環堪貫中虛腹可捫規模因樸著

容受以升論黠黠苔封色依稀土蝕痕俯將輕漢爵前

欲媿商尊俗已無精鑿評難定一言會逢歐趙輩重與

考淵源

諸同年釀分餞行于陳秉之寓樓即席留別四

首

來迎華蓋出朱輪九陌炎歎万斛塵慙愧曲江諸舊好  
綠槐陰下餞歸人

有約難隨座主行

許座師于一月前南歸  
余乞假之  
旨未下

秋風漸老碧

芹羹濟時心力輸公等只好江東作步兵

鷄鸞隊裏一沙鷗飲啄曾同十載遊今日分飛憐隻影  
煙波滿眼又回頭

戶小先拚入醉鄉解衣盤礴自生涼定知此後同年會  
故態猶能記老狂

自怡園二十一咏偕西屋前輩賦呈副相揆公

箕營場

游人裾上塵馬跡門前路一徑轉琅玕蒼然三里霧

雙竹廊

七松少傅宅五柳徵君屋  
輸此十步廊天生兩竿竹

桐華書屋

亭亭百尺枝下蔭一欄  
翠童子正開門桐花風滿地

蒼雪齋

碧玉方開籜量成六寸圍  
濯枝多雨露新粉欲沾衣

巢山亭

遠移三疊屏窠兀凌空起  
勢壓小亭低前臨一潭水

荷塘

記得初移藕田田貼水荷  
香風隨櫂遠花校去年多

北湖

放眼際遙碧近身葉似舟鴛鴦最相戀驚起却回頭

隙光亭

一片平頗藜穿林光瑣碎閣欄如鳥巢隱隱柴其內

因曠洲

洲勢極空曠分幾派江因添方丈室面面與開窗

邀月榭

月出東皎皎月落西茫茫有時夜無月倒影搖湖光

蘆港

春漲今年足蘆根上岸生人間正炎熱物外已秋聲

柳汭

千株萬株柳夾浦濃于黛忽度一聲鶯濛濛烟雨外

芡泚

芡是吾鄉實充盤憶水羞羨君池泚上兩處種雞頭院長

城居在雞頭池上

含漪堂

涼從何處來適與披襟遇風過水微波于中得佳句

釣魚臺

璜溪坐姜叟濠上游莊周果若知魚樂不妨施直鉤

雙遂堂

心跡既雙清宦遊亦雙遂一事勝香山公頭白猶未

南橋

兩厓石齒齒一壑流濺濺橋北與橋南仙凡此分界



紅藥欄

手自栽紅藥旋開穩重花禁中吟未足歸到日西斜

靜鏡居

先生靜多妙跡顯心逾靜借問祖師禪無塵安有鏡

朱藤逕

十萬寶瓔珞舉頭迷下上好咲王君夫紫絲開步障

野航

野趣隨所寓陸居同水宿偶以舫名齋已忘舟是屋

次荅廖若村同年贈別原韵二首

六人三載同書局出入群聯鴈一行武英殿編輯韵府余與若村吳山掄

宋山言汪紫滄錢亮功六人皆癸未同年也 自比蟲魚辭蠹簡忽投珠玉滿

奚囊感深紈扇秋風篋夢散宮衣舊日香敢對離筵論  
後會直緣情重不辭觴

此身無用且分飛却望晨霞阻夕霏竹簟暑風攜枕去

蘆塘秋雨待船歸長留異日心期在莫謂同門出處非

李頎詩在昔同門好片柳湖烟水色願隨老鶴息塵機

友如今出處非  
尊公先生余癸酉同年  
聞尚有彈冠之興故云

### 送陳秋田赴叙州長寧宰

鈎棧連雲幾百盤漏天南去尚漫漫一身多累無長策

万里嚴程似左官小邑攜家須約俸故人臨別勸加餐

輿圖盡處江山麗只作當時荔浦看  
君前任荔浦自  
言山水極佳

### 棗東書屋大雨聯句

炎歊釀昏夢猛雨發疲曳郭雙補天潛女媧射日恣后

昇宮恕銀界指河傾畢躔知月離潤三光乍弛職九野

悉蒙翳顧秀陰陽兩相賊水火時為帝得非崑崙囚倏

受顛頊制悔暑路舞商羊朱波騰黑蜮繆湘酣鑿鉅鹿

戰奮助昆陽勢汪退電母掣礮雷公拔精銳張匠蛟

螭牙爪活虎豹股栗斃急點繩脚粗密飛絲縷細郭簷

垂匹練下庭漲立談際宮奔渾赴溝渠森莽連埤堦森

森竹箭直滾滾浮漚繼潤大麓易以迷繁星恐不繫顧

巢飢有鳥啄葉啞無蜩嘒是處長蓬蒿何人理孫蕙悔

群淹窘政息烝涉愁厲揭繆入市冪盪舟行泥禹乘橈餘

汪車輕難就熟馬怯失奔踈張滑澆喜兒童沾濡憐僕

隸郭盆荷卸浮瓣林果脫危蒂宮青沈兔目槐翠刷龍

鱗薜木潤柳腰任自誇葵足寧煩衛顧醜石苔髮披枯槎

菌釘贅悔餘餘鶴鳴蟻封徙蚓弔蛙坎瘞繆陰穴咽暗啼高

翹惜華毛汪鷹鸕尚屈猛燕雀盍少憇張万里覘郊畿

八埏首幽薊郭遙傳地欲浮仰視天方憊宮泔泔衝塞

去岌岌排牆逮富粟慳賣珠貧薪劇剉桂潤西北正愁

霖東南想連暝顧金隄做捷帚薄產關種藝或者太浸

淫將毋成滲沴可無魚鱉患且免蝻蝗蔽農占覲有秋

王省實惟歲悔丞相調玉燭至尊執寶契繆旱澇互

乘除豐凶恒酌劑注吾曹復何事良會况有例張雖非

酒為池幸以瓦為袂郭居人宅如泛過客駕頻稅宮何

勞禁足方自頌安心偈

木潤

詩社得陶潛飲徒偕蔣濟顧

遠坊輪蹄散深坐吟箋遞借驢罷朝謁跣屐寡叅詣宴

樂需雲宜括囊坤象閉防虞沈竈事倉卒移床計

餘悔

零

瀝似啁晰傾倒敵慄候

繆

閒齋一喧寂浮俗等塵境

汪

盤餐省癡蠅墻聖剝牡蠣

張

嗟我孤影形愛君好兄弟

束帶已發狂解衣復成曠筵攜吹月瑄袖挾掃雲篋索

醉來已遲忘機止或泥

郭

流連永今夕唾涕棄一切從

教清漏移莫問明星曠刻殘三寸燭哦出五言製手寫

類蠶眠口占非獺祭

木潤

摧頽興易盡爛熳詞多綴瞥眼

過氛烟倒頭成夢寐去將荷篋等歸及鼓舟柁老翁何

所求却立望秋霽

餘

題潤木閉門采詩圖

子初僦居槐樹街尋常兩板何曾開開門偶爲買花出  
一月上市凡三回長椿寺前紅紫銜木本價昂草本賤  
買其賤者兼取多意在閉門觀物變煌煌自昔帝王都  
眼中變幻何所無無情草木有榮悴况此假合成形軀  
色塵未透初禪界昨者采詩今采畫坐消光景向聞曹  
何日粗償焚券債故園松菊荒荆榛花間夢斷如隔晨  
當時看爾年最少已是半百頭人我今念念成枯槁  
輸爾圖中顏色好遲留且耐十年官六十歸來未爲老  
牽牛作花十二韻索匠門諸子和

過雨簾櫳潤微涼院落幽老翁開咲口小草拈花頭名

自雙星得時將大火流若非經閏月已是報初秋綽有  
含風態其如見日愁霞朝房早斂露夕蕊重抽續續如  
相替匆匆可自由及時催絡緯連類况蜉蝣豔極那能  
久嬌多孰比柔且依行藥徑勿傷曝衣樓急景何顏駐  
餘光瞥眼休似憐歸日近作計與勾留

旬來多雨聞廣寧門外泥深數尺歸期蹭蹬書

遣悶懷

天行當溽暑水勢汨郊原歸計尚難料世途安可論投  
床聽暗雨倚杖望初暝賴有同心友衝泥一扣門

匠門  
車騎

見  
過

寄祝劉蘧菴光祿七十壽

我昔皖上遊過君之里第南陵好山水風俗古不替君  
時已挂冠鄭重敦夙契開園設几席話舊接襟袂次第  
見諸郎森森盡蘭桂一別十八年回頭如隔世聞君今  
七十精采溢顏際室有參語賢齊眉正同歲全家多道  
氣此福天所畀養壽得竒方烟霞閱清閔假如在高位  
已合懸車例何似白樂天林泉早爲計

有 詔於金州衛立水師營即以海賊之新就  
撫者充其弁伍草野迂儒無從獻末議漫紀十

六韻

詔設金州戍今爲要害城水軍嚴約束海寇戢縱橫控  
險非榆塞分屯異柳營渠魁推作帥丁壯籍爲兵甫脫



欽定四庫全書  
蘇詩卷四十一  
二十五

檻車困還加鞶帶榮戰船齊魯給餽餉薊遼并貫罪  
恩良厚優降事不輕波濤通外國帶礪近陪京欲以招  
餘黨因之息遠征 睿謀虛聽受廷議集公卿實藉綢  
繆計俄聞贊畫成聚蛇爲窟穴圈虎傍茨荆鷹眼終難  
化狼心故自獍徙戎宜有論賞賊似無名世孰防牙孽  
人方恃太平區區誠過慮咲爾一鯁生

次和匠門雨中白蓮十二韻

玉井如船藕移來是白蓮花開元澹澹雨洗更娟娟出  
浴全身潔離塵一鏡妍細珠留的皜活汞走勺圓太素  
知無匹孤標儼得仙靈根超十地色界淨諸天影濯銀  
河畔香清羽扇邊賢迷深自隱絲引誤相牽帶咲聊悠

爾

李群玉詩處  
世心悠爾

含悽莫泣然凌波愁浪惡傾蓋望雲穿

江浦舟遲泛湘臯佩合捐輸他冰雪咏孰與鬪便嬛

次韵匠門陰雨不止

兼旬雷失威入夜雨尤猛欠伸局腰脊靡騁瞻項領流  
惡溝瀆盈居汗箕箒屏干門烟勃窣九陌路壅梗童出  
怕淤泥婢炊愁濁井桁衣變黝襪被感单冷庭作沼  
聚漚簷為瀑岳綆誰歟請祈禱古者有修省澤馬兆何  
祥坎輿戒多雋清吟召蝮螫怒叫禁蠲黽庶令沴氣消  
徐俟曦光晒人胥出淪溺吾亦散憂耿世事疾轉圜天  
心易翻餅勉旃毋多談行矣需少頃歸途指蝮螫去意  
隨舳艫此時咏君詩有味彌雋永

六月十四夜久雨忽霽小庭涼月如秋五更起  
坐即事成咏

夜靜窗微明雞鳴曙猶未攬衣步庭下簷溜初止沸斜  
月在西南殘雲風掃旣銀河洗我目玉露清我胃一涼  
襲虛襟餘潤及群卉流光閱醉夢好景失聾瞶獨有無  
寐人先知秋氣味

喜晴次匠門韵二首

正爾巡檐嘆伏陰忽開霽色見天心月將東出氣尤爽  
火已西流炎不侵

後三日  
立秋

赤脚一雙休踏履白絲半頂

喜抽簪呼童急掃堦前地準備高人策蹇尋

勿論熟熟與生疎

禪家有熟熟  
處求生疎語

閉戶多時出少車隔宿

傳詩邀客和歸期檢曆遣兒書徑鋪嫩蘚瓊相似盆豔  
秋花錦不如更貰迎涼一瓶酒此間何事可愁予

院長近以赤藤杖見贈合之前詩意蓋欲易我  
畫義也作詩報之

昨以病乞假先鐫半年俸挂杖坐無錢棄杖辭寓諷實  
則心愛之時時手摩弄貧家乏冗物一竹當兩用挂畫  
乃名義隨身即爲從先生欲巧取猥以赤藤送此藤產  
塞山年深蟠石縫細筋漸成骨直理透條綜堅如鐵鑄  
成亦可扶躡躡璧來田不往曲直何足訟平生車馬裘  
義取朋友共於茲獨有恠貪得比藝種挾兩詎爲多失  
一官輕縱公廉忍見奪我寶彌增重幸賜雙杖銘俾得

終身誦

立秋前一夕匠門席上作

此會循環忽五年老於交誼倍依然何曾清景辜風月  
又聽商聲入管絃齒序慙余居客右詩成君官讓誰先  
眼前看是尋常事或有人從異日傳

立秋疊前韵用唐竇常詩作起句

笑老重經癸巳年况逢秋至轉凄然露瀼梧徑蕭蕭葉  
雨上琴床緩緩絃是日復雨万事蹉跎羊視後一帆迢遞雁  
爭先候門知有兒孫在烏鵲連朝喜浪傳

是日繆湘芷攜酒肴就余寓餞別偕匠門秀野

潤木三疊前韵

風雨相留欲判年足音蓬藿喜跫然情知老馬難回策  
目送歸鴻又拊絃擘紙聯吟豪鬪健圍碁賭酒怯饒先  
時與匠門對局  
賭酒互有勝負良辰一醉誰拋得生怕狂名被俗傳

次汪紫滄同年見送原韵四首

鱗思反壑羽投林知我誰能諒此心引疾敢云臣計早  
得歸尤荷 主恩深裝輕似葉行添杖筆秃如椎懶廢  
吟只有故交忘不得每從別賦感登臨

新詩字字比驪珠懷袖分光照座隅畫裏烟波鷗境界  
燈前風雨鴈程途金蘭義重言多苦藥石功深病或蘇  
却笑迂疎真不揣欲將農圃傲蓬壺

月華南畔浴堂邊形影相隨近十年雲步改遷尋丈地

寬裳吹散大羅天，曾叨香案稱清吏。誤籍蓬池作謫仙，  
努力文章留報國。尚餘殘局在芸編。

不貪支俸給官薪，分定榮枯付往因。自信我爲當去客，  
劇憐君是未歸人。一身只要貧長健，万事休憑夢當真。  
別後有書煩屢寄，免教北望苦馳神。

立秋後三日匠門家集梨園爲勝會再邀余入  
座四疊前韻

夜似長年日，小年逢場何忍獨醒然。野王岸上停三弄，  
司馬江頭輟四絃。月裏寬裳聽乍徹，座中白髮感尤先。  
梨園法曲皆供奉，或恐人間是別傳。

道山亭在福州城內宋程公闢爲守時所建曾

南豐爲作記者也歲久傾圮林子鹿原得其故址將築堂名以辨香蓋取陳后山向來一瓣香敬爲曾南豐之句屬友人繪圖來索詩

宋時道山亭剏自程太守南豐與作記膾炙人在口從此此亭名遂爲曾氏有歷年經八百頽廢來已久鹿原嗜古人尋碑攘榛藪肇窠三大字云出林希手其字今倖存其人無足取大哉復古義義取別賢否築堂名辨香欲以妍蔽醜在昔陳與曾同時實師友子今生末世獨立嘆無偶私淑夫豈徒行將奉箕箒庸非學問力即事期不朽我昨遊三山探奇意多負銀袍者誰子曾解讀碑否

劉後村福州道山亭詩城中楚銀袍子來讀曾碑有幾人



警露軒鶴雛爲鹿原賦

吾聞鶴之性與露最相警軒以警露名借鶴用自省今年果得鶴先後名寔併出殼曾幾時風標已閒靜仰窺俯有拾咫尺回素頸主人院落寬老樹蔭苔井雞群知獨立瘦骨挾仙影未得戛然鳴奈茲秋夜永翬天會有日羽翮在修整

題樓敬思夢洗三硯圖二首

曾於夢裏得三硯三館今來校秘書不信校書真應夢但拋心力注蟲魚

夢筆如江夢鳥羅微凹聚墨不爭多文章豈必關神授知有工夫在洗磨

次韵奉酬院長西厓前輩贈行之句

直從毛羽假翩翩

用南史蕭引傳中語

送我歸耕潁上田  
比較鷓

鸞宜落後籟揚糠粃愧居先東門古有迴車路西夕天  
留養拙年且喜歐陽為學士蓬山領袖得詩仙

附原作

湯右曾

鷓鸞臺閣正聯翩忽賦歸與種秫田為樂恐教兒輩  
覺生天一任丈人先元和體有三千首謝朓才論二  
百年我欲舉君還自代似君真合領群仙

敬業堂詩集卷四十一



敬業堂詩集卷四十二

海寧 查慎行 悔餘

計日集

起癸巳七月  
盡十二月

暑雨連旬初秋就道自去年二月引疾乞休及是  
六百日矣淵明云行行循歸路計日望舊居而今  
而後歲月庶爲我有乎

七月朔長假出都諸同年同學祖餞于廣寧門  
外即席留別

襖被蕭條去離筵鄭重開大生歸子色榮捧故人杯紫  
陌回頭隔青山就眼來渭城歌最好朝雨浥輕埃

是日  
微雨

蘆溝道中遇德尹自嶺南典試回京

出入如相避翻驚邂逅緣遠來君報命獨往我歸田別

緒三秋鴈吟情一路蟬對床風雨約迢遞待明年弟臨別有

明年乞歸之約

### 涿州待渡

督亢陂邊柳秋條尚蔭人浮橋經漲斷驛路出泥新兀兀欲成夢皇皇多問津讓他車馬客爭渡入紅塵

### 暮投三家店

不敢怨泥塗來當積潦餘群群逐鵝鴨處處阻溝渠酒肆蟻爭埕瓜棚蠅趁虛也知皆逆旅到此復趨趨

### 過新城留別虞武通同年

舊宰茲邑因大計降調

赤縣當煩劇期年極苦辛心勞書下考官罷得長貧世

議近逾隘交情老自真西湖有鷗鷺遲爾作閒人

白溝道中即事

水利遺塘灤燕南怕雨多原田平少岸沮洳溢爲河改  
路尋牛跡分裝累馬馱艱難愁一老蒿目意如何

未至雄縣二十里老僧寧初新瓶一菴避暑小  
憇遇汪荇洲前輩自吾鄉典試回茶話移時而

別

精舍何年築前臨古堠匆征途尚炎熱佛地果清涼却  
扇邀僧話分茶與客嘗班荆留數語後會兩茫茫

雄縣早發

秋暑如三伏僕夫貪早涼孤城浮水氣匹馬望星光露

下田塗白風來荇藻香行行天漸曉柳外見帆檣

庚午二月與姜西銘同飯於趙北口姜食魚被  
鯁以酒下之徑至大醉一時傳爲嘻咲今復經  
此悽然感懷

二十年前路髯姜並轡過食魚憐骨鯁下酒怪顏醜老  
友他鄉盡吾生去日多向來談咲事淚雨變滂沱

解渴吟

勞人兼病暍一勺望甘霖直覺烹茶緩還嫌汲井深蟬  
清惟蛻殼柳老或空心我是忘炎者聊爲解渴吟

賣瓜者

辛苦瓜田叟瓜成計息微物因多致賤人以渴充饑官

守傷根戒行將抱蔓歸食糶多棄子遺種漸防稀

商家林買草笠

頭輕宜戴笠野服換商林雨庇全身濕晴邀片席陰下

車寧望揖上馬憶曾吟

往年隨駕清暑奉官俱戴草帽余曾有詩紀之

青

窮平生夢蹉跎直至今

余又有謝賜魚詩云綠蓑青窮平生夢臣本烟波一釣徒

肩輿

禮有扶衰病吾今釋負擔徒行何不可安坐得毋慙未

免役人力將何解謔談香山援舊例陋巷得乘籃

樂天詩陋

巷乘籃入朱門挂印回

曉過德州感舊

閱徧畿南驛禾麻喜歲豐平蕪千里碧初日半天紅世



故論今昔 皇情荷始終 壬午冬 行宮隨命入內廷 十年牛

馬走力盡往來中

旅店七夕懷德尹潤木兩弟都下

燕齊風一變 連日苦熱 今朝頓涼 邾魯柝相聞弦月涼於水繩河

澹入雲雞鳴無失次鶴警不離群誰念獨吟客油燈坐

夜分

曉入高唐州境始免泥淖之苦

遙遙三十里一塔表州城海市奇觀失 夢溪華談歐陽公至高唐館見

沙中車馬人物歷歷可辨時謂之高唐海市 沙程病骨輕車行出糜淖人意

就寬平方朔祠邊路 城北舊有東方朔祠 南來第八程

扶犁叟

偃僂出茅茨扶犁長恐遲辛勤憐一叟遊惰聽群兒巢  
燕將雛候耕牛舐犢時人情畧相似老者近乎慈

過荏平新令吳寶崖尚未到官戲題旅壁

荏平新邑長赴任底遲遲毗俗二秋望王程九日期多

傾浮蟻酒省作捕蝗詩一宿吾隨便何煩地主為昨在都門

問寶崖何以不赴任知其欲避捕蝗之役也

### 東阿道中

今日東阿縣重瞻少岱山河流連巨野地脈隱礲關宋檀

道濟置闕于礲破山下地當在縣南今不可攷剝棗棘籬外漚麻溝澮間土風

占月令一破旅人顏

出都時買得于文定公穀城集心慕其人七月

初九夜宿舊縣乃公故里也夢公投刺見訪自  
叙出處本末甚悉覺而異之敬紀一律

館閣論前輩先朝一穀城如何犯公諱直欲改余名事  
往儀型在神交夢寐清篋中有佳集去國仰高情

自汶上至濟寧田間多種藍及烟草

本業拋農務群情逐貿遷刈藍多用染屑草半爲烟樹  
藝非嘉種膏腴等廢田家家坐艱食那得屢豐年

濟寧寓樓坐雨

南池將買櫂北騎此休鞍得免載濡窘復叨即次安群  
喧因雨靜一榻占樓寬我獨邀天幸人間路正難

寓樓讀陶詩畢敬題其後

顏謝非同調，千秋第一人。精深涵道味，爛熳發天真。有  
耻難諧俗，無官肯計貧。平生頑懦意，感動賴先民。

雨中獨遊南池

外吏無交舊，歸人簡應酬。烟波宜獨往，風雨感重遊。遠

影千帆暮，孤亭萬樹秋。多情天井派，日夜向南流。

東泉志自

滋陽至寧陽界共六十三  
泉俱入濟寧是為天井派

舟發濟寧

波紋平熨帛，岸影曲隨弓。坐覺一船穩，行聞八牖通。城  
根滙洗汶，雲外指龜蒙。多少乘輅使，誰憐大小東。

過仲家淺望魚臺諸山

解纜雞三唱，前征曙色催。蒼葭迷藪澤，白鳥起灣洄。日

挾川光動帆衝霧氣開好山青似染的的近魚臺

南陽鎮二首

五丈溝東望陂湖極淼茫

寰宇記泗水自任城界經魚臺東與菏水合一名五丈溝

西自金鄉流入

楊椿支兩畔緩溜走中央古市秋來廢平田潦

後荒船船載漁具聊復免流亡

一帶山形隨周遭地勢拗老隄崩泐石敬屋落苦茅是

處添新戍何年咏樂郊最憐農失業牛犢飽芻茭

食魚

沛水今年大河魚逆上流垂竿來接尾舉網出駢頭童

僕餐皆饜庖廚棄不留多年京洛住此味當珍饈

泗上亭

亭長臺邊路茫茫閱世多自墟秦社稷誰保漢山河芒  
碭雲銷氣粉榆社改柯空傳沛中叟曾聽大風歌

食蓮藕有感

蓮藕同時賣湖鮮賤勿論劈蓬香爪甲嚼雪脆牙齧過  
客連櫂販居民種水繁好爲來歲計采實合留根

晚泊韓莊閘

百丈轉坡陀孤舟泊旋渦遠山浮沛縣急水灌沔河鴈  
驚連天去萑苻棄地多坐看殘月上徹夜有漁歌

枕上喜聞櫓聲

櫓聲清似雁搖夢下前汀轉益歸心急能教醉耳醒風  
生南北埭月過短長亭不解眉山老欣聞泗岸鈴

臺兒莊阻風

行止原難必天涯信短篷明知滿槽水不敵石郵風高  
枕沈舟外微吟折葦中向來多逆境閱歷已成翁

迦溝順風掛帆

侵曉長年起開頭報順風端歸天意許利涉客心同後  
至無奔馬前飛及片鴻布帆安穩在計日報兒童

入新河見糧艘覆敗者

黃水奔騰入新渠變濁流誰云無大患凡漕運漂流米二百石以內為

小患二百石以外為大患見何喬遠記依舊有沈舟已鑿終難塞將淤在

急籌治河兼治漕何策兩綢繆

五更渡黃河食頃抵天妃關

淮強黃勢弱擘箭出盤渦水碧見檣影月明來棹歌蛟  
龍三舍避鷗鷺兩涯多不用占風色聞雞已渡河

雨泊淮關

鎖鑰嚴關閉裝囊獨客輕市樓傳檮暗鄰舫吐燈明酒  
罷人初靜風高浪不驚淮南今夜雨好片滴篷聲

淮上留別族弟信斯

怡荆好兄弟五世義門如每下南州榻長停中道車貧  
來初析箸老去各移居尚爾敦宗誼殷勤一慰予

淮陰侯廟下作

滅楚還封楚破齊曾王齊英雄歸駕馭股掌若孩提失  
國嗟烹狗糜身付牝雞土人憐至骨廟像儼公圭



泊寶應喬介夫枉過舟中兼餉家釀

翼折桓山鳥喬家季獨存再過城外路及踐別時言

春初

介夫在京師聞余有長告意初未之信故云

風雨藏書屋鶯花縱權園

向為尊甫

侍讀公作縱棹圖歌又為令兄庶常君題蒹葭書屋

舊題如夢寐負此酒盈尊

高寶漕渠夏秋凡兩決半月前隄工始就舟行

過此有感而作

民力東南竭官程西北勞隄防隨處潰畚鍤不時捺航

稻連塍沒菰蔣比岸高古來論水利豈獨為通漕

過露筋祠下

舊是鹿筋梁何年祀女郎至今留廟貌考古實荒唐曉

氣蛙魚國秋聲蚊蚋鄉人家葦花裏放鴨滿陂塘

邗關小泊同年王樓村攜酒就舟中小飲

半日揚州住爲歡累主人同年官自達

調李

二老分相

親我袖羞懷刺君囊轉諱貧攜觴還挈榼感激爲情真

過高旻寺輓湘雨長老

宿昔還山約蹉跎久未忘高僧先下世法子繼開堂物

外交遊少人間感嘆長餘生知幾日來炷影前香

丁亥春隨 駕遊金山寺爾時便作休宮之想

初心幸遂重經山下風便不及泊作詩以結後

緣

蓬萊重入望風引去如飛指水言猶在登山力已微憑

誰留玉帶幸自脫朝衣

余遊金山詩有緣脫朝衫披野衲句

爲報江神道

無田我亦歸

爲謝江神豈得已有田不歸如江水蘇東坡登金山句也

夜宿常州城外

渡江纔兩宿今夕到毘陵  
酒熟橋邊肆魚跳柳外冒烟  
波千里船簾幕幾重燈漸與鄉園近  
惟愁米價增

梁溪道中

山水多平遠秋來悉美田  
紅薑肥似掌紫芋大於拳  
玉剥菱腰濶珠收芡粒圓  
老饕歸爲口一味說豐年

村童籠致黃雀二十尾用六十錢買之放生口

占一首

八月野田雀成群入市闌  
充庖憐爾命倒篋破吾慳  
孰出樊籠外並生天地間  
放飛因戒殺不是望銜環

過吳門擬一晤何屺瞻吳漪堂陸冰賢諸同年  
竟爲風雨所阻戲以詩代柬

屈指筭良晤到來風雨狂往還期不偶跬步病相妨酒  
要乘閒置游須計日償防他三子咲歸去有何忙

初到家二首

生涯與時背所事率滯阻六月擇歸期既雨且當暑涉  
秋甫就道涼意動砧杵締綌乃征衣到家換時序淒風  
不堪著初服已吾許

久客返敝廬曩基無改築南榮望阡陌西舍通隣曲舊  
時杖白頭零落多鬼錄後生類好事開口問朝局吾衰  
苦善忘聾聵廢耳目報以一不知惟應話農牧

荷葉堂詩集卷四十一  
九  
中秋桂庭對月與徐韓奕馬衍齋及兒孫輩小  
飲

桂樹影娑婆飄香散月波中秋晴日少樂事故園多  
邂逅成良會團圓好放歌兒孫齊在眼不醉更何如

省先父母墓

墓祭仍隨俗君羹不逮親轉傷通籍晚無補在家貧去  
卜青烏吉歸瞻翠鬣新松栽欣免觸山鹿爾何仁

行園

畦丁老且死五畝廢不治朝來杖藜徃露草紛披披桑  
柘析為薪藤蘿蔓成籬池荒鷺群散地瘦螿族移蚤知  
蕪穢場中有茅菴基畫圖良已具結搆伊何時

禹慎齋  
曾爲余

作初白  
菴圖

腹痞

本意歸田樂，翻將病到家。  
胃中無壘塊，腹內有癥瘕。  
銖兩醫方誤，毫釐砭石差。  
去夏在京師針治不效  
所憂非性命，衰態自堪嗟。

藥師周晬

去年傳遠信，錫汝藥師名。  
我老歸初見，兒今齒已生。  
但求無疾疢，不敢望聰明。  
撥棄人間事，猶餘膝上情。

九月晦日馬衍齋見過同爲雲岫之遊

近遊老尚能，獨往難決驟。  
自從竹垞喪，結伴少耆舊。  
馬仲晨叩門，邀余赴雲岫。  
放船非意料，勝踐出邂逅。  
我有

一枝藤筋強節堅瘦何曾頤步失所向傍顛仆扶衰幸  
有賴懶病庶可救連山際東南崖窾露晴晝九十有九  
峰一峰爲領袖前蹤悵未到初願晚始就迨此風日佳  
後期恐難又

泊舟甬里堰肩輿行經南北兩湖

水盡乃見山捨舟遂遵陸村遙雞犬散路狹田禾熟漸  
入漸幽深近身空翠撲濛濛午曦澹黯黯秋氣蓄忽於  
杳靄中豁達開心目三百頃湖光長隄亘其腹霜林環  
四照倒影漾紅綠惜哉好畫圖冷落付樵牧平生汗漫  
遊臨老思歸宿終當結茅茨來此占一曲

晚抵高陽山麓上九曲磴夜投雲岫菴

到山路疑窮，鋒立青巒。岢松陰十二轉，一上改一觀。忽  
聞鷹叫風，側背來高寒。夕陽墮西陸，返景飛彈丸。闐寂  
禪者居，地偏天形寬。鐘聲落海外，列宿棲簷端。老僧咲  
迎門，藹若平生歡。謂言登陟險，知我步履艱。汲井爲烹  
茶，拂牀與安單。蕭然一行脚，只作道侶看。

十月朔五更鷹窠頂觀日出

吾聞堯時十日曾並出，域內大水凡九年。自從羿射九  
日落，大禹注海納百川。獨留一曜隨天旋，爾來四千一  
百七十載。朝朝沐浴蛟龍淵，登州蓬萊閣。太山日觀羅  
浮巔，文人遊跡徃徃到鷹窠。之頂僻在東南偏，海隅荒  
陋題咏少。好事或聽旁人傳，率云九月晦後十月朔是



時日月行同躔初生類合璧吞吐寅卯前居民生長此  
山頂目所睹記云偶然况乃遊人一生或間至何怪欲  
覲無由緣我來此處看日出要是乾坤曠蕩之奇觀山  
高地窮天水連尾閭東洩茫無邊明星有爛黑氣作霧  
非霧兮烟非烟移時一痕破滿空血色紅殷鮮乍浮復  
乍沈水底疑被長繩牽須臾涌出水面圓紫金光現樽  
桑顛自東而西不知幾万里一綫倒射洪波穿亦不知  
自高而下幾千万萬丈一躍直上團團天觀者目眩心  
神遷却尋雞聲到宿處松窗黑暗僧猶眠

糴米

官罷無祠祿家貧斗石艱致炊誰巧手欲乞我慙顏懸

釜三秋後傾囊一飽間瓶罌防鼠竊莫咲老夫慳

祝尚于潘竹村偕過不值各以新詩見投奉荅  
一首

卅載風塵兩鬢絲得歸翻悔挂冠遲門無俗客閒何礙  
里有耆年晚始知銜袖方將修半刺投名先已枉新詩  
從今步履毋辭數各趁腰輕脚健時

連日雪不止忽憶塞外舊遊

臯蘇祠下拜龍公預祝明年二麥豐稍密儘教封塾戶  
漸高休遣沒牛宮久無書寄孤鴻外曾記身穿万馬中  
誰信茆簷蒙敗絮出門一步怕頭風

藩司頒新曆至

天上軒轅紀山中草木年授時存國典頒賜及村田舊  
曆行當棄陳人祗自憐千官孟冬朔猶記午門前

聞王丹思及第之報喜而有寄

有命難終屈多才豈易量

武英書局議叙同事諸子先  
後得官丹思為奏事者所抑

迄不得選復  
為畫供奉

蹉跎留畫苑瀟洒赴文場一賦辭成識三

年願果償喜聞王芍藥秋後領群芳

庚寅春丹思作芍  
藥賦其結語云開

時不用嫌君晚君在青春最上頭  
余戲呼為王芍藥竟成大魁之識

冬至後一日復雪

經旬重遇雪半月未開冰積素林光合微陽井氣升蕊

疎梅尚禁梢重竹難勝傳語敲門客竒寒幸見矜

時有以俗

事相  
擾者

自題臥室

生踰七九年考室忝堂構敝廬足風雨自我先人舊塗  
墜旁免穿茅茨上除漏于中劣容榻巧墁功易奏蠶繭  
密包纏蜂房疏戶牖陰陽有向背時日無避就何以占  
吉祥甘眠宵續晝

曉窗展卷有味乎昌黎吾老著讀書之句輒成  
一律

捨此身何著蠹書時復翻味應同菽粟老豈廢饗殮請  
益虛師友流風覲子孫却慙更事久多負古人言

後十日復大雪

天工如刻期一月連三白同雲聚其族巧作十日隔初

聞檐溜融旋見瓦溝積幽人閉關臥護此一庭潔里老  
有好懷衝寒走相索叶豈無新釀黍與汝回煖熱肺病  
適余侵臨觴主慙客居鄰幸匪遠歲晚况休役有約待  
晴和傾壺看新麥

小齋前移植梅樹

擬徙池東樹規除砌下苔最先論位置次第及栽培疎  
影移燈就生機戰雪回歲寒吾與汝滿眼盼花開

次副相揆公塞外遇雪用舊韵見懷二首

遠在三秋訊開當雪霽時斷雲歸岫晚朔雁渡江遲舊  
事炊梁夢新篇叠韵詩别前初約在宛宛見心期

班行同引籍掌次近除名馬上衝寒色山中曝背情君

才方大用吾意適孤行若問菟裘計鳩巢拙未成

來詩云勉

酬初白願為報一菴成

座主宗伯許公枉駕敝廬感今追昔敬賦長律

致謝

童穉相親到白頭公今予告我歸休二三子外無同輩  
五十年前是舊遊僻地煙霞迎几杖敝廬風雨傍松楸  
多承古道關存歿在處追隨淚欲流

閒咏

延曦開竹閣向晦掩柴關世自如烟動

謝靈運詩民動如烟我靜而鏡

吾猶比鶴閒靈苗須善護雜念最難刪此境於何驗無  
如寤寐間

臘月雨

五行遞休旺歲晏陰亢陽曾是冰霰晨際茲淫潦妨一  
旬恒雨若物性遂失常南山慰朝濟四野烟霾併百草  
萋以綠苔枝競芬芳堦前蚯蚓出檐角春鳩鳴虹見亦  
非時乘機潛發生頊冥溺厥職氣洩冬不藏田間一禿  
翁所願歌時康側身屋漏底仰視天茫茫

半月以來坊局史館前後輩削籍者凡二十一  
人偶閱邸抄慨然而賦

占籍幾三百同朝半盍簪故知員太冗不謂譴方深枯  
苑寧關命行藏各拊心幸收麋鹿跡終莫負山林

癸巳除夕家讌有懷諸弟二首

室煖紅爐炭窗浮畫燭烟歲華如夢裏家慶且尊前  
日晴難料殘宵醉可憐龍鍾還自幸扶病過蛇年

稍稍初心遂匆匆節物違寒庖俱野饋質庫寄朝衣有

弟分南北時德尹澗木留京邸  
信菴客粵西未歸無官減是非一門推我

長齒序也應歸

敬業堂詩集卷四十二





敬業堂詩集卷四十三

海寧 查慎行 悔餘

齒會集

盡甲午  
一年

甲午春杪座王大宗伯許公邀楊晚研宮贊陳梅  
溪侍御爲娛老會僕以門下士忝克四人之數周  
而復始迭爲主賓其秋同宗兄弟年六十以上者  
凡五人復有合釀之飲大抵季必有會會必有詩  
一年中唱酬者十居二三因以齒會名吾集亦歸  
田一樂事也

元旦大雪

跡遠疎賓客心空穩睡眠正宜晴閉戶况乃雪漫天與

世喜無事爲農占有年庭梅生意動報我一花先

過詩友錢木菴虞山故居

城角三間屋傾欹少比鄰半生餘酒債四海失詩人兒

女早無累

木菴三子長爲農次依僧季業儒一女歸吾家孝廉姪

身名果孰親翻

憐吾未達感舊尚沾巾

上元雨中獨登虎丘二首

上元無月亦無燈十里山塘冷欲冰夜泊扁舟寺門外

梅花樓下弔詩僧

時根紹上人已去世

劍池側畔侍

宸遊寓直曾爲三日留一夢八年還記

得舊題詩在仰蘇樓

丁亥四月隨駕駐此

晦日招潘竹村祝良仲叶雖兄弟小飲

舊讀唐賢集多爲晦日遊閒中追節物病起念朋儔折  
柬幸能致開樽聊共酬貧家稀宴會何惜小遲留

臺心菜

未綻黃金粟先抽綠玉簪大烹克瓦釜小摘滿筠籃不  
賣何求益多嘗詎覺貪齋厨無異饌童僕也分甘

雪中玉蘭花盛開

閨苑移根巧耐寒此花端合雪中看羽衣仙女紛紛下  
齊戴華陽玉道冠

春分前連日雪

九十春將半鶯花世界非向榮違物性餘慘露天機幸  
不多時積從教到處飛舊巢雙燕子社日倘來歸

春社

今年社是春分節半月寒深閉戶中花少有時還朔雪  
雨多無日不東風村巫環玦傳神語里老豚蹄望歲豐  
除却農談吾嬾聽何煩分酒更治平聾

種芭蕉二絕句

東鄰帶雨移花本西舍連泥掘藥苗庭小不曾留隙地  
又添牆角一芭蕉

卷心乍展影揆莎葉葉攢成綠一窠不爲無花偏愛葉  
花時長少葉時多

清明日西阡焚黃感賦二律

憶昨營窀穸旋馳赴  
闕衰夢常驚冷節歸及荷榮光

桑梓陰功在

先贈公行善於鄉至  
今鄰叟猶能道之

柘椽舊澤傷踏青諸

父老歎息看焚黃

近展松楸路遙瞻雨露天有生逢

聖代無祿盡親年

淚落休官後

恩踰卜葬先誓收清白跡畢景守岡阡

亡室柩前焚黃再作一首

一道黃麻制存亡乃異辭祇緣吾有愧不謂爾無知地

下應含笑生前未展眉

元微之悼亡詩報  
答生平未展眉謝

恩憐子

影收涕為羣兒

喜晴

春光霽後佳節氣田間正晨興啓蓬蓽豁若奩開鏡岸  
草既柔穠渚牙亦鮮盛村南杏粧卸村北桃鬟靚鋤麥

農祈秋浴蠶婦修政俗醇游惰少候至赴功競新火稍  
出林舊鄰無改姓吾家世居此少長識愛敬雞犬聲互  
聞牛羊行讓徑晚尋畝樂益遂桑麻性寄謝市朝人  
誰能逐造請

燕來巢

燕燕來何許飛飛羽不齊我方歸舊社爾又換新泥借  
問依人住何如擇木棲雨狂風正惡勿厭草堂低

客自會城來傳老友翁蘿軒龔蘅圃之意垂訊  
近狀口占報之

徑荒居又陋過懶戶常關時事罕聞見舊交疎往還嗜  
從滋味薄詩到應酬刪二老知予者因風一慰顏

去秋手栽海棠一本春不作花而德尹潤木兩  
家此花最盛戲作一絕寄之

階前手種海棠樹樹小條疎著蕊難翻被兩家園主妬  
有花偏讓老夫看

三月二日偶遊硤石精舍

三月風光連上巳人如蛺蝶鬪裙衫兩山鐘磬東西寺  
十里煙波遠近帆拄杖我來尋履跡題詩僧乞署頭銜  
篋中亦有新排集倘許經房貯一函

白香山年六十四  
編集寄香山寺

上巳與子姪輩飲西園海棠花下

寂寞逢嘉樹流連及令辰若非攜酒賞幾負滿園春絕  
豔驚雙目浮光動四鄰好花如子弟笑擁白須人



西林庵浴

我本無垢人多生依淨土無端墮五濁特以有身故自  
從歸田來迷昧晚稍悟雖逃塵土汨尚被詩酒汗蟣蝨  
緣見侵浣除急先務山僧開浴室午告湯沐具愛此松  
下風解衣入雲霧微溫徹毛髮積患瘳沉錮滌腸即未  
能搔背不猶愈老蟬初脫殼呼吸通清露嗒焉忘其身  
垢膩於何附

曉過鴛湖

曉風催我挂颿行綠漲春蕪舛欲平長水塘南三日雨  
菜花香過秀州城

葆光居賞牡丹兼示祝良仲賓季爾田兄弟五

首

轡幕高張白石臺花情亦似感栽培已過穀雨三朝後

直待主人歸始開

時賓季爾田  
初自粵東歸

閱盡紛紛桃李姿遲開獨占豔陽時只消一夜東風力  
扶起花頭五百枝

道是吾鄉第一花芳時無客不矜誇兩朝二百年門第  
得似君家有幾家

尺三花面大於盤一丈花梢半出欄頭白老翁來未晚  
霧中看勝雨中看

曲宴曾陪賞內廷蕊珠樓閣隔青冥一枝歸折非無  
意猶有當時舊賜餅

三月晦日偕楊晚研陳梅溪赴座主大宗伯許  
公之招流連三日敬賦五言古體詩一章用志  
盛事兼訂後期

世會賴人持進難退仍易公歸天下仰鄉曲風先被逃  
矣黃髮期曠哉赤松志遠收伊呂迹近託張邴契洛社  
與睢陽高情千載嗣九人不迨半猥許門生廁良辰春  
夏交勝踐東西寺年尊耄將及興逸衰猶未籃輦出匪  
遙杖藤行可寘堂無絲竹鬧庭有煙霞膩外靜絕市謹  
中虛得池位雖然營圃墅亭榭隨布置不窮土木妖所  
以矯豪侈何嘗廢宴衍芻豢薄滋味不列水陸珍所以  
警貪鄙初焉立家法久乃變風氣道大等行藏心空冥

同異乘流坎斯止衆取我則棄欲知鵬鷖遊豈外逍遙  
義欲知名教樂即此真率意一會日經三一年會須四  
非疏亦非數天賜皆君賜幸生山水鄉各有登臨地  
創舉良獨難後期當以次

從東山大悲閣步上南山道院

山北山南一逕通又從紺宇扣琳宮千年樹老根穿石  
百尺梯危勢轉空上界神仙風肅肅下方樓閣雨濛濛  
羽人何福能消受長在晨霏夕靄中

過惠力僧房訪葛友峰

穿過林巒第幾層到門雙屐響登登祇應趙郡蘇和仲  
猶識成都杜伯升蜚遯難求借隱伴

張平子賦欲  
蜚遯以保名僑居

直似此山僧白頭相對吾滋愧撒手懸厓尚未能

題西山快哉樓

東山標一堦樓與堦尖齊日光先到松篁勢盡低爽  
宜延眺聽老漸怯攀躋緣境隨時結詩成信手題

碧雲寺

以上四首皆硤川遊歷之作

徑曲耐幽尋杉籬步步陰煙光遮市斷殿影赴潭深昔  
受梅檀供今傷樵牧欲知增減劫成壞視禪林

信庵貽我湘竹筆几

往與陳

六謙

楊晚研

輩結

交始

臨池

我腕

不能

懸落

筆

恒苦肥至今衫袖上墨汁烏淋漓十年課官書猥克抄  
寫爲一從拋筆墨有指如駢枝愛弟粵中來美竹貽湘

妃斑筒圍五寸文采光陸離銛刀剖其半承臂良所宜

惜哉硯田荒此几將安施毋忘持贈意三復幼槃詩謝幼

槃筆几詩當君持贈恐不堪大似無功饗鹽虎

座王許公別後寄示七律二章叙連日山游之

樂再次來韻

溪山佳處榻長懸暇日追倍樂境偏靈運賦中行采藥

康衢歌裏看耕田馱逢俗客談時事閒與鄉人結善緣

雨笠風襟無恙在畫圖容易着神仙

茫茫宦海濶無邊幾見虛舟濟巨川白香山詩巨川濟了作虛舟退

步始知原有地掉頭誰信不關天高人入社同招隱大

老還鄉例好禪得御籃輿吾竊幸乞身多及太平年

自西阡步登龍山小憩妙果寺成鏡軒

杖藜無百步欄楯有千家未覺平簷淺全虧老樹遮童

挑西澗水

西阡之北有泉  
去此纔半里

僧製本山茶佛日長如此何

愁莫景斜

村家四月詞十首

茆苫枳落趁高低草色平鋪樹影齊一片綠陰行不到

家家門外有黃鸝

生長蘆村與葦鄉單丁門戶怕逃荒春來娶得紅裙婦

添壑橋南百本桑

去年桑葉賤如毛今歲蠶多葉價高大抵乘除常得半

半償安分半償勞

小滿初過上簇遲落山肥繭白於脂費他三幼占風色

二月前頭蚤賣絲三幼即三眠也見放翁詩自注

野老籬邊獨一家卧聞隔竹響縲車開窗自起看風雨

日在牆東苦棟花

活東幾日變蝦蟇細瑣謀生亦有涯租得山田還帶瀟

種菱時節種魚花

蠶忙粗了接農忙早晚官符不下鄉見說城中多大戶

帶征猶欠隔年糧

大麥離披小麥黃連朝次第欲登塲開籠莫放新鷺鴨

怕損鄰田二寸秧

一尺良田種一科語出齊民要術早年宜黍水宜禾老農信口



言皆驗比似兒孫閱歷多

山妻赤脚子蓬頭從此勞勞直過秋海角為農知更苦  
合家筋力替耕牛

寄徐觀卿庶常四首

人間路狹田間濶天上宮多地上稀難得玉峯徐吉士

筮朝廿日便思歸來書云平生宮况以廿日行之

乞歸初不為鱸蓴肯作江東第二人霧豹一斑窺寸管

雲龍半爪現全身

跨鳳驂鸞幾隊行列仙名籍滿瑤京不須更說鷄棲樹

阿閣巢多自見輕

石公山下約耕雲十畝桑麻許見分觀御有別業在洞庭西山與余曾為

卜筮我為退難歸已老可憐事事不如君

副相揆公惠寄人參一斤賦謝

官非致富具官罷適得貧獨不奈病何父吟兒復呻時

建亦患病貧家抱富病動與參苓親東產禁入關南方價彌

珍十金易一兩又苦贖雜真投之湯劑中日飲僅數分

持此望療疾越人視秦人荷公千里懷拜貺俄盈斤瑤

光散藥笈紫炁交斑璘春秋緯瑤光星散而為人參禮緯下有人參上有紫炁沃

以碧琉璃藝以紅麒麟庸醫亦色喜奏效如轉輪果然

黍谷寒變作陽崖春公惠洵已厚我慙鬱難伸雖延草

木年等是幻泡身所期調元乎且晚秉國鈞時聞枚卜列名溝

中多待澤一老何足云

德聞姪以先京兆公加贈嘉議大夫誥命一

軸見示敬題於後

吾宗京兆之子孫當時濟濟推清門大賢餘澤久漸替

先代龍章今僅存族譜亭前一回首欲斥斯人言可醜

若教此軸落渠家賣珠毀櫝夫何有

本支冢孫弟兄構禍蕩盡先人餘業

故有此歎不忍斥其名也

珍藏似爾豈非賢中有詒謀二百年科名

仕宦尋常事世業終須孝友傳

余舊蓄古鏡一枚形正方背有飛魚二鱗鬣生

動周遭一百八十乳水銀徧裹上著血皴朱砂

斑不知何代物也偶閱元裕之集馬雲漢家方

鏡背有飛魚與此形模正合元有七律一首載

集中疑即馬氏故物而今爲我有喜續一篇紀  
之

馬家古鏡形模異人世皆圓爾獨方細乳流丹周四角  
爛銀磨鼻貫中央出波鱗甲飛如活透骨頗黎冷放光  
知有廉隅難入俗合歸老子爲收藏

蟻鬪

飯罷徐徐捫腹行階前蟻陣太縱橫巧排畦水常山勢  
鏖戰昆陽鉅鹿兵國手圍棋分黑白村兒鬪草計輸贏  
轉頭一笑全無爲不解當場抵死爭

兒建補官北上兼寄德尹潤木

爾往因門戶吾衰且杖藜行期今始決藥裹病仍攜  
兒時

病尚未全愈

老閱晨昏易貧難出處齊京華見諸叔有信共

緘題

梅雨將至曝衣庭下睹舊賜紗葛袍感賦

一桁高懸犢鼻褌篋中剩有賜衣存為防梅黠重開

看閒與兒曹說 王恩

禾郡試院古栢曾濟蒼繪圖索詩即次原韻

龍筋纏左紐鶴骨鍊孤形閱士幾頭白遇君方眼青愛  
頻攜畫卷惜未入圖經變化誰能料風雷或晝冥

德尹陞侍講却寄

雁行官序記隨肩

余兄弟三人同官編修每入朝班仍以齒序先後

久次今來

合轉遷

用漢書孔光傳中語

聊與家門增氣色也勝陪黠六年前

已丑初夏春坊日講員缺奉旨選擇  
掌院曾以余名擬上既而用陳鍾庭

### 生日示兒孫

家世少高年傷哉傳父祖吾生良過分六十已踰五自  
爲鮮民來奔走備艱苦每逢先忌日雙淚落槃俎忍復  
受稱觴成行拜兒女殊非老人意轉觸傷心緒世教日  
以漓五鼎儉三釜厚已薄所生逢辰競華詡其或侈宴  
會開筵召歌舞此風非自今此事尤不古矧余衰且廢  
徇俗一無取仕宦閱十年依然北門窶先廬僅無恙聊  
足蔽風雨常恐病見侵去來難自主未知從茲往尚復  
幾寒暑但願汝曹賢甘貧守前矩貽清義有在何用幹  
吾蠱

夜枕喜雨

挂壁閒龍具黃梅十日晴忽聞中夜雨殊慰老農情枕  
簟通霉氣溝塍走去水聲跳蛙如送喜不厭繞除鳴

庭前蜀葵十二韻

蜀葵吾手種五月儼成林葉葉青蒲扇株株碧玉簪卑

叢猶計尺高榦突踰尋耐久誰如爾敷榮方自今此花自五

月至初秋相續不斷有花偏犯暑得地肯移陰抱素矜孤潔中有白花

一株施朱競淺深露晞疑濯錦風暖快披襟爛熳知時及

歌斜怕雨侵寧無衛足智尚有向陽心石竹羞相亞山

榴妬不禁畫工難設色詩老獨搜吟莫漫嫌貧窶芳醪

又一斟韓魏公詩芳醪對一斟許魯齋詩但恨主人貧且窶不教相對舞衣紅皆咏蜀葵句也

日本繡球花

南風來海外吹綻小團圓  
吐萼初含綠染根俄變丹  
垂懸蹴踏袞袞壓欄杆  
雨打戎葵折留渠愛惜看

盆池荷葉

藕梢種盆池初葉青錢似  
一葉復一莖漸看翠蓋起  
豈無十丈花奈此三斗水  
託根適有制小器吾局爾

家童以梅水滌硯既申諭  
之復詮次成篇當僮  
約一則

梅雨降天泉其甘甚仙醴  
淪茶需此味久貯益清泚  
甕盎謹蓋藏非時不輕啟  
客嘉乃一薦視若大烹禮  
研垢利亟除無端用泉洗  
殷勤示僮約誤事胡可底  
開池用



養魚汲井用淘米貧家用水法一一須酌劑推類以及  
餘吾言當善體

雨乍晴

鬢髮落草與堦平屋漏痕餘滴瀝聲老去一身隨燥濕  
漫勞鳩鵲報陰晴

觀插秧二十四韻

百汊通舟楫千畦罷擘耨人情須解澤天道豈屯膏夜  
足分龍雨晨添浴鷺濤渾渾泥破塊汨汨溜鳴槽及見  
苞初拆先期種淨淘

齊民要術淨淘種子經三日澆出種

露苗齊若剪風

葉弱於縑維耦羣衣襪于田畢赴暮事因當務急義取  
立根牢寬解青腰束勻鋪綠扇蹇橫從分緯經去行列

準茅絢滑達聊防蹶瘡痂那暇搔胼胝兼踵趾仰俯混

頭尻正爾如針細何時比岸高栽培從幼穉功力積纖

毫小鴨浮鳥背新鵝沒乳毛篝車思預祝稂莠待徐孀

餉婦烹蠶豆皤翁壓麥糕放翁詩旋壓麥糕邀父老衢歌隣巷苔幽

樂土風捺身雜耕耜倍心知稼穡勞問誰司命屬笑我

代丞髦偶倚孤藤杖閒攜半榼醪勸農勤本分撫已愧

嬉敖有蠹除灰鞠周禮秋官蠹氏掌去鼃黽焚牡鞠以灰洒之則死以其烟被之則凡水蟲

無無蟲慮食桃蟲食桃粟貴亦豐年斯在眼秭鳩已先

澤史記百草奮興秭鳩先澤

### 梅雨初霽

隴畝有情農無端負春榮十年京洛住風氣習高燥左

臂雖病風土脾幸未槁還鄉豈不樂顧已迫衰老翻畏  
梅雨多侵膚劇蚿蚤兒童報新霽起視天宇好蟬嘒林  
葉初雞鳴曙光早微颺自南來掩冉被庶草夏課晨有  
程方當事研討曝書良先務趁此日杲杲

舶趨風歌

吾聞千里以外風不同人間乃有万里之長風來從海  
上梅雨後紀自西郊野叟眉山翁古稱博物家無若周  
元公爾雅釋天篇八方風色以類從北涼西泰凱南谷  
自東頽焱飄庖暴昌暄一一命義無相蒙周禮保章十  
有二妖祥乖別占荒豐下而莊生齊物論以至應劭風  
倍通颺瀏颺颺颺颺颺颺颺颺颺颺颺颺颺颺颺颺

語實工形容舶趨之名特未悉土俗傳說惟吳中吳中  
五六月水盛溽暑方蘊隆此風東南來一掃雲翳還虛  
空商羊黑蜮潛厥蹤炎官亦退三舍避大啟橐籥伊誰  
功三日濕氣消五日暑氣融連綿七日九日尚未止快  
哉何暇分雌雄羊角初從何處起合而為一浩蕩來無  
窮丘真人西游記風初起  
如羊角須臾合為一風國家象胥譯九重白雉入  
貢兼青熊良商豪賈狎海童高帆幅亞樽桑紅中男長  
女各效職飛渡溟渤如輕鴻此時田間一老翁置身恍  
在蘭臺宮不知人生更復有何樂但向北窗高枕卧聽  
聲蓬蓬

鷹毛扇

稜稜疑戴角六翻舊稱雄誰翦摩雲勢而爲弄袖風近  
身無棄物當暑奏奇功莫逐斑妃扇秋來怨篋中

庭前新設日棚

奇峯突兀升晨莫多幻狀群來燭我室火令方用壯誰  
能待涼秋坐受驕陽光貧家愛惜費奇計役心匠架木  
於中庭從乾取巽向

宅經云從乾向巽名入陰

東西墻所限南北稍

通望剖竹以爲椽縛繩乃施帳卷舒一夫力自我剏新  
樣天亦無如何居然聽人抗片雲風不散赤日走其上  
但覺晝景長焉知炎勢王解衣盤礴卧客至蒙見諒憶  
昨扈從年孱軀昧自量跨鞍五六月万竈逐焚燭渴飲  
道旁泉形神聊一暢勞筋誓永息疲馬就閒放跡遠倦

驅馳情孤愜宜當青藍十幅布氣壓錦步障即事不願  
餘休陰獲微尚

雨後納涼

夢過雷霆了不驚起來涼月在南榮靜中機候誰先覺  
已有一蟲墜下鳴

六月廿二夜熱不能寐五更起步庭下徘徊到  
曉

夜熱不成眠展轉達五更開門上殘月適與微風迎大  
火將西流銀河去無聲林亭散踈影露葉涵虛明薨薨  
羽蟲飛喔喔村雞鳴身如聞草木受此旦氣清

沈松年觸暑見過爲余寫行藥圖小照贈之以

詩

昔年三十四張叟為寫照是時氣方豪抱膝坐長嘯

癸亥

夏張子由為余作槐陰抱膝圖侵尋落塵網行止非意料一夢迨桑榆

回頭失吾少自觀疑隔世那免旁人笑沈生技入神下  
筆天下妙曩者京洛遊不輕貌權要朱門致厚幣却去  
臂頻掉獨愛山澤臞足音赴蓬藿老夫正避客畏熱如  
畏燒瀟灑實藉茲掀髯引同調吳縑六尺雪靜對屏聽  
眺三日晝始成投牀忽狂叫張圖示左右童稚皆曰肖  
廼知神理憑在骨不在貌一杖兩屨鞵清涼徹毛竅高  
楊蔭風渚密竹移烟嶠外勢拓微茫中深藏窅窅過橋  
茅宇遠轉徑柴籬繞力圃方自今幽情老彌劬允宜置

丘壑何用談，廊廟稍待條。甲成重煩添，藥鈿

偶得鸛雛畜之階。下旬日馴擾如家禽。

老鸛巢古木，孤雛失遙汀。養之羣雞中，旬來食宿并。草際飛拍拍，花根立亭亭。有時照盆池，長喙梳短翎。適逢螻螳飽，暫脫魚蝦鯉。方當竭澤時，時亢旱河何處潛汝

形不如儕野鶴飲啄且一庭。

苦旱

火雲燒海壖，禾黍供魚燔。是田拆龜兆，下隰高平原。山根曲曲谿，近溯十里源。其流本易涸，三尺淤泥渾。何當千桔槔，渴若接臂猿。下飲罄呼吸，洵洵寧復存。一井給百家，乞漿稍出村。人情斲所少，昏夜拒叩門。我有小池



水舊未資灌園經旬漸將枯  
遑救鮒與鯢畦丁仰沐浴  
爨婢充餅盆緩急吾豈無  
義從易地論開園聽使汲  
兩不受怨恩喝者盈路旁  
其能以手援喟然望雲漢  
安得天瓢翻

立秋後四日得雨喜疊前韻

雷鞭起龍蟄雷火林欲燔  
急雨隨秋來沛然滌焦原  
出高而施下天澤殊泉源  
頓令赤堊墳化作塗泥渾  
物情俄頃變判若王孫猿

柳子厚云猿之德靜以常王孫之德踈以囂

向來沸蜩

蟬聞寂無一存雞犬聲逾靜  
羊牛亦歸村但見簑笠翁  
倚杖臨柴門濁酒貫鄰曲  
農談慰田園檐低劇投蜺  
海近疑徙鯤汲婦免抱甕  
浴童喜傾盆西成即未知  
姑以

目曉論良苗與秕稗各被霑濡恩我亦領新涼詩筆聊  
復援閒庭有花木枝葉爲翩翩

雨後遣興

秋田一雨洗萌芽餘潤還沾學圃家苦竹鞭抽行地筍  
戎葵朶放出籬花身憂天下原非分老覺浮生亦有涯  
野色閒門無客扣夕陽影裏數歸鴉

重至西湖雜感六首

行宮昨巡幸侍從偕東枚  
詔許孤山遊綠坡陟崔嵬

高亭揭佳要

御書佳要亭在孤山最高處

正面湖光開再到踰八年

重扉鎖蒼苔夕陽錯金碧竹樹浮樓臺

聖主軫民

艱翠華無復來湖流亦漸縮清淺如蓬萊

三百六十頃葑田半平蕪泊舟湖心亭坐失西南隅兩  
隄遙隱現彌望菰芡蘆吳中連歲荒竭澤準此湖誰興  
百年利開濬繼白蘇

菩提古律院中有禪者堂兒時侍我翁曾宿道公房  
奄忽五十載沙彌成老蒼爲言禪堂灾室被池魚殃師徒

二三輩借歇鄰僧牀世苦善緣稀十方如一方我貧正

髣髴何以副汝望

昭慶舊寓被火住持僧乞余重作募緣疏故云

故人喜我來

謂鄭春薦高誥仲

有約晨往踐中流泛彩鷁酒果

諧終宴殘暑颭以收荷風輓秋扇各陳別中事過去同  
掣電齒脫頭亦童是形無不變惟留真面目重與吳山  
見

昔我同朝友蘿軒

翁康

與田居

龔蘅

竹深

章豈

乃同年

通籍甫歲餘後先解組去各守先人廬錢子

我持

我彌

甥比亦賦歸與世途日湫隘親舊旋凋疎合并復何幸

皓首仍相於湖山近可樵湖水淺可漁此生知幾見莫

負秋風初

潯陽賢郡守

朱恒齋時客吾郡

歷政廿四年罷官世業盡無計

營歸田竭來泥馬城卧痾僦市廛良醫天下少買藥慳

囊錢我欲招使出一覽江湖天足攬兼畏風躑躅行不

前當路非無交車音聽楚然惟餘老賓客同病心相憐

龔蘅圃屬題田居圖圖為王石谷所畫三首

我愛西泠龔侍御候樵開徑擬村莊前身似是黃清遠

好補田居辭九章

元蒲江黃景昌自號田居子作田居古調辭九章事載吳淵穎集惜其辭

不傳候樵開徑九章中篇名也

更愛虞山王石谷爲君破墨寫桑麻晚年變盡大癡法  
瀟洒自當名一家

上澗烟波下溟田朱陂楊柳陸池蓮爲農果若畫中樂  
吾亦嬾尋辟穀仙

到湖上不及訪諦輝禪師而歸寄詩代柬

諦公世壽八十八見說形神倍清拔有時挈鉢身入城  
健若雲端出巢鷓隨行不用木上座一日往還能步屐  
葛藤斬盡松性孤那怕霜根被纏殺開堂說法踰四紀  
坐斷高峯梵王刹一拂何曾肯付人問着三交兩頭瞎

似憐我是無家客，遠枉山中八行札。我來便合去尋師，却向石頭防路滑。雲林咫尺徑未到，回首湖西山巒巒。明年擬坐雨安居，眼膜終須寶篋刮。

題章豈績觀碁圖

宇宙一碁局，白黑兩戰場。細極蟲蟻微，大而至侯王。胥爲競心役，得失爭毫芒。遂令坦坦塗，嶮熾劇羊腸。可憐橘中叟，機事亦未忘。國工吾不知，幼稚勝老蒼。圖中一童子與老叟對局所以達觀者，袖手於其旁。

從姊丁節母八十壽令子修遠來乞詩

吾家賢姊丁節母，年二十七稱未亡。是時殉夫勢不可，有兒在抱姑在堂。夫之兩弟尚小弱，形影相傍何佺佺。

婦供子職母兼父兄道亦以丘嫂當皇天欲貞苦節苦  
一一艱瘁教親嘗糲貧固已少簪珥時絀又復罹凶荒  
淚流繼血食有指骨盡吸髓炊無糧秋看烏哺感魚菽  
春睹燕乳憐粃糠晨春寧資相杵力夜績肯借鄰檠光  
全家仰俯賴搯作母不自白旁人傷阿婆下世兩叔娶  
寡鵠矢志孤雛償父遺一經課使讀世業克紹孫成行  
乾坤豈終斬雨露松柏要必經冰霜蓼荼茹盡蔗味出  
佳境漸入今方將母年八十兒六十白須綵袖前稱觴  
中秋節近風物爽桂樹菽菽飄天香月中之兔爲擣藥  
長生會得仙娥方

西園早桂八月始花偶拈二絕句

兩株桂自先人植歲歲開當七夕前校是今番花信晚  
秋香還占別家先

消息西風任客傳花時長結一村緣而今勘破黃山谷  
鼻孔猶爲晦老牽

季方兄招同聲延兄曾三芝田兩弟於西林菴

爲同宗五老會席間喜賦時甲午中秋前三日

古人重睦族籩豆禮無廢奈何世教衰此義久云晦家

宗遠有緒望實鄉國最伐木歌卒章吾猶及前輩宦游

鹵莽出晚景侵尋逮歸到忽一年去秋八月十三日抵家今恰一年矣

病多逃酒債喜聞折柬召喚起初心在八月撰良辰五

人合嘉會兩兄吾所敬兩弟亦吾愛居近三里中年皆



六旬外茅菴傍先壟徑轉蒼山背風日假清光松篁發  
幽籟僧來具茶薺童去攜鮭菜飛動愜平生老狂餘故  
態流光弦釋箭盛壯已難再但願五白頭偷閒輒相對

中秋雨集拙宜園賦呈宗伯座主晚研前輩

節到今年正秋分此夜中

是日秋分節

重尋三宿約惟欠一

首

人同

陳梅溪以疾不至

菴氣通荷葉林香入桂叢滿城傳勝事

來看雪髯翁

可惜團團月雲封得樹堂檐虛燈動影池澗水生光聽  
雨篷籠外吟風几杖旁平生師友在到此分真忘

十七日陪遊秦駐山得詩六首

夜雨晨乍晴茲遊天所許攜筇出煙郭振步凌雲嶼公

本海鶴姿飄然命儔侶身輕無險徑心曠得豪舉誰云

溟濤寬直欲巾笥貯

出郭

社稷已丘墟冕旒尚祠廟當時伐山處馳道餘蓬藿可

憐愚氓愚不記暴秦暴家家棧羊豕坐享血食報今年

早太甚水乏蘋蘩芼母乃爲神羞徒憑山鬼嘯

始皇廟

平生汗漫遊不識蒼浮子今來尋別業愴若經蒿里好

事賴閒僧詩名猶在耳山林耆舊盡太息烟霞委

詩老徐陰

浮別業

山後石狀狼山前林靄濃名藍繚而深風氣于焉鍾下

有千頭橘上有百丈松潮聲卷地起響奮出谷鐘禪扉

日日開未缺茗椀供留題紀歲月孰繼三人蹤

半潮菴老僧出

素冊  
乞詩

家住錢塘西未觀曲江濤及茲陟海嶠  
惜攀躋勞長風東南來吹我上  
嶒嶒忽然空四顧快覺身歷高井底  
俯孤城三面被浪淘築堤效精衛  
木石焉得牢誰能驅此山外捍兀  
巨鰲

絕頂  
觀潮

秦鞭不可施頑礪倚天外一山坐  
少肉佛力將安賴榛莽長於人  
菴廬小如蓋忘機任去住涉境有  
成壞置身万仞岡達者觀其大  
少陵固云尔臨老斯遊最

茅菴

### 食新米

秋水通港脉吳船來海濱稍聞米價賤  
歡喜動四隣荒厨乏宿春八月亦食新  
雖然營一飽力惡不出身薄宦

比曼容退耕輸子真餘慙到僮僕并作浮情民官鼠竊  
太倉家雞仰空困物生各分定吾自棲吾貧

由葑門至牧瀆舟中喜晴

積雨川初漲秋晴候尚暄帆移背城路竹密近山園野  
市漁樵散人家鴈鷺喧太湖知漸近水色半清渾

重過鄧尉大司寇徐公墓與公子觀卿話舊二

首

昔會尚書葬重來二十秋好山增氣色高蔭鬱梧楸賤  
日蒙青眼流年感白頭及門多著錄檢點幾人留

藉甚賢公子歸來一壑專論文空老輩誓墓及中年跡

忝同朝舊姻從世講聯

觀卿與家德尹  
為兒女親家

相看多道氣應

許數周旋

五雲洞

鄧尉山形斷柴莊嶺脉延言尋五雲洞試酌鉢盂泉草  
偃秋迷徑林深午見天老僧年七十揖客鳥巢邊

午飯東山庵

村落樊籬外人烟墟墓間稍穿蒙密路又轉一重山樵  
擔行相引禪扉晝亦關薄遊煩地主畏飯慰衰顏

晚入聖恩寺瞻漢月禪師塔與古菴老衲茶話  
鐘聲天半落麗刹占岑隅地拔千章木門開万頃湖來  
因瞻影塔老喜接浮屠倚賴青藤杖隨行勝給扶

重陽日由鄧尉坐眾船沿太湖濱抵漁洋灣登

法華嶺與觀卿拈韻各賦五章

九日乃溯流古來無此法適茲泳游趣遂與魚鳥狎望  
望銅坑橋前行出蘆夾湖光三万頃際眼窮一霎地盡  
日脚垂天低浪頭壓近山浮蛟鼉遠艇點鳧鴨奇懷洵  
曠蕩良會殊欣洽滿載洞庭春十分傾蘸甲

黃柑釀酒  
名洞庭春

色見東坡賦

鏡面三十里淼瀰似無涯片飄截湖來小泊當嶺岬居  
民雜耕釣竹樹環坳窪中有佛者宮法華及曇華頭陀  
不好事籬落無黃花手拾墮巢薪爲余烹烹土茶屋山見  
微徑林隙縈修蛇直上千似顛迴身俯烟霞

新城老詩翁于焉戀清景漁洋曾自號四海傳歌咏

阮亭

王先生絕愛此中山  
水因自署漁洋山人  
樓指今幾何勝遊闌如屏履綦已

陳跡我到踵前猛濤聲  
拔湖洪飛上萬松頂  
西風迫吹

帽新鴈時一警俯仰有古今  
徘徊惜俄頃誰為後來者

繼躡最高嶺

折東不可致陪遊欠詩僧  
謂湘曉禪師 兩人亦不孤勇往快

得朋平生偕隱願躡步氣益增  
西指小九天西山林屋洞為十小

天中第九天觀鄉有別墅在其下 下有田一塍買隣隣苦少約我我未

能具區舊志荒文獻於何徵  
君家富圖籍攷證庶足憑

我雖腰脚頑肯辜手中藤  
焉得七十二峯峯與同登

是節古所重吾生隨所遭  
向來閱星霜南北母已勞  
有

時泥飲伴座上爭題糕  
間亦吐狂詞氣粗陵二豪塞垣

九月雪瓊帽蒙戎袍陪獵入圍場分麀行燎毛乞歸復  
何事雙髯餘蕭騷左臂雖病風尚堪持蟹螯地鄰甫里  
陸心契柴桑陶君壯我就衰逝波日滔滔明年身縱健  
何處重登高

重陽後十日曾三弟招集西林菴是日微雨杲

山法師不期而至

再舉重陽會何妨十日遲林巒真得趣晴雨總相宜踏  
屐堪尋菊登高劍有詩閒僧來不速社飲倍淋漓

立冬後二日座主宗伯公偕晚研梅溪枉過村  
居次日移榻妙果山房再遊菩提寺得詩四首

乾鵲聲中客欵門畫船啣尾泊籬根掃除黃菊荒蕪徑



映帶丹楓穉穉村半月先期傳父老一家喜氣到兒孫  
海山不盡東南望登陟應須次第論

桑榆餘煖在田廬初約重尋幸不虛行處聚觀傾里巷

有時問荅及樵漁能文客到先投句

時徐觀卿至自好  
王峯詩先成

好

事僧來盡乞書

晚研工書所  
至楮墨堆案

寄語同朝諸大老莫將入

座傲懸車

招提游更招提宿四五人添八九人

時許伯勤馬衍齋  
果山法師俱入座

承念兩兒  
亦篤行

自有此山無此會勿論誰主復誰賓靈泉怪

石供幽賞煦日和風應小春知是它生緣境在每逢佳

處輒逡巡

流光已付陶甄外世味多消朴率中省對梓筵慙地主

免教冠蓋炫鄰翁  
熊羆起渭嗔  
何晚蟋蟀歌  
唐儉可風  
報畲  
朝恩還有處  
白頭相見祝年豐

仲冬二日招諸兄弟續舉真率會明日芝田弟

詩來次荅一首

弟勸兄酬又一堂  
依然同產似君良  
唐書孝友傳劉君良四世同居雖族

兄弟猶同產也  
小春已過冬猶暖  
短晷雖移夜甚長  
老去喜為

無事飲興酣  
聊鬥此身強  
明朝夢覺三竿日  
始信齊州

接醉鄉  
用東坡睡鄉記中語

再次曾三弟見投原韻二首

橋欹路滑限東西  
一櫂來尋曲折溪  
每愛招邀聯近局

又從唱和得新題  
陋邦关我詩同鄣  
雅量輸君酒到齊

木盎瓦盆隨分設何須几上復加綈鄴中記冬月几上加綈

人中聾叟飲中仙挹袂何妨更拍肩地僻魚蝦貪入市

天晴箕畢快移躔是日早雨晚晴松筠歲晏留賓賞莞蒹枯庭空

待雪填却关竹林惟二阮同時應少弟兄賢

抄書三首

人言冬是歲之餘自分生涯伴蝨魚比似王筠猶有媿

白頭方解手抄書南史王筠愛左氏春秋凡三過五抄餘經子史皆一過未嘗倩人假手

無數空花亂眼生摩挲細字欠分明西洋鏡比傳神手

八廓重開為點晴

烏雞已療病風手秋兔猶存見獵心炳燭餘光吾若此

兒曹那不惜分陰

臘月雷

天公號令何其垂夏慳膏澤冬發雷先期三日礎流潤  
雪候變雨成黃梅螻蛄夜啼蚯蚓出有聲來自南山隈  
靈籟倒行坤軸裂霹靂上劈天關開吾聞宵雅哀十月  
矧迺歲莫陰陽催至尊端拱穆清上宮府庶事歌康  
哉震來虩虩百里爾特向山谷鳴遭回淮南子遭回山谷之間陋  
儒鯁鯁誠過計誤信耳目生疑猜庶徵休咎豈關汝一  
飲且酌消寒杯

池上梧桐一本先君所手植秋來忽枯家人折  
以為薪用作此歎

苦竹不實鳳苦飢霜風拗折枯桐枝知音者希巧匠死

琴瑟之材同廢屨我來撥灰三太息重是先人手親植

紛紛桃李總輿臺從此荒園少秋色

起結二句用太白詩語

十二月十六日赴青芝山會座主尚書徐公墓

### 感賦二首

清德宜鐫石佳城仰

賜金

公以少宗伯贈尚書恩給全祭全墓異數也

哀

榮朝典備存歿

主恩深十郡千人會三年獨子心

謂大

司空反虞猶孺慕未忍進祥琴

視我真猶子從公始得師

乙丑春公為國子司業余時備弟子員親授作文法度

有經傳舊業無路報深知夢奠噫何及歸休悔稍遲

余於

癸巳秋長假還鄉公薨一年矣

寢門餘痛在淚雨滴青芝

### 祀竈一首

一年俄逼臘爆竹接比鄰不用讎驅鬼自將詩送神晨  
餐甘脫粟夕爨付勞薪此意天應諒吾非媚竈人

敬業堂詩集卷四十三



敬業堂詩集卷四十四

海寧 查慎行 悔餘

步陳集

起乙未正月盡五月

謝病歸來杜門七百日矣不得已而作閩游憶戊寅春夏間偕朱丈竹垞南行今往還仍取此路東坡詩云團團如磨牛步步踏陳跡用以名集聊當解嘲

元日立春大雪

家居閱兩年連遇歲朝雪東風不解凍就我作冷節鄰比莫往來應門乃虛設野人喜無事復此庭宇潔薺麥正青青蘭芽爲誰茁



二日喜晴

昨日既喜雪朝來復快晴  
開軒納東曦檐滴微有聲  
天豈去我遠始和得人情  
呼兒具紙筆枕上詩已成

四日西園散步得三絕句

算是今年第一回  
草根殘雪尚堆堆  
春風氣力強於杖  
扶起衰翁踏凍來

三日爲期已過期  
晴光先動碧琉璃  
苔枝照影魚兒躍  
及取水開鷺未知

疎籬外繞翠檀欒  
梅橘中栽五畝寬  
抵得實封三百戶  
頭銜自署老園官

人日赴榆村兄真率會二首

七十三翁齒最先人言兄乃地行仙白頭兄弟肩相竝  
不敢誇張說少年

容易開尊得故鄉况逢雪後好風光梅花消息巡檐近  
絕勝題詩寄草堂

上元前二日芝田弟招集深寧齋席上次韻

杖履從遊地難忘直至今

余少日詩文極蒙伯父霍丘公賞識

風流前輩

盡結託晚年深照座紅燈入當杯白髮侵懷新兼感舊

愁和郢中吟

西阡老梅一本不知何人所植花時偶與諸兄  
弟婆娑其下芝田有詩再次韻

千林一樹特標奇冰雪初消雨未滋問著不知誰手種

却來與我伴裏遲

送湯納時表弟赴吉水任三首

兩派江流百折灣  
全家攜入畫圖間  
桃花夾岨春旗影  
直到廬陵不斷山

牧羊圈豕盡彈冠  
一第終輸本分官  
不負種花心力在  
吉州抹麗顛州蘭

文江舊是人文藪  
歷宋經元迄有明  
此段挽回須老手  
莫言邑宰事權輕

次韻答又微姪

平生持論笑孤高  
老去羞稱供奉曹  
幸有田園收影跡  
敢從壇坫薄風騷  
披吟滿卷輸君富  
置酒當筵看客豪

莫道懸車年未及吾薪入爨已勞勞

來詩有未老投閒聲價高之句故云

庭前紅梅花時恰值春寒

側側餘寒薄薄粧疎花嫩蕊太郎當能禁臘底三番雪  
翻怕春來十日霜

次韻答東亭弟滇南見懷二首

自笑原非炙輶髡一歸聊爾慰慙魂退飛事異冥鴻弋  
俯啄心空澤雉樊伏臘鄉風隨戚黨耕桑活計委兒孫  
只愁兄弟天南北却聽清吟似峽猿

字如黑蟻筆頭髡天末書寬久病魂喜爾力能禁瘴癘  
知余情頗戀丘樊一門最盛推同祖万里相望各有孫

若論桑榆收未晚莫因擇木感騰猿

用晉書李克傳中事

江行六言雜詩十八首

魯公傳乞米帖元亮有饑驅詩不妨舉家食粥笑問此  
去何之

人家泥浦漁浦驛路樟亭赤亭黃犢鳴邊草綠畫眉啼  
處峰青

船頭載餘杭酒枕上看富春圖老伴不離鶯鴨浮踪又  
落江湖

江流東射如箭帆勢西張若弓此去特邀天倖平生逆  
水逆風

一兩竿颺酒旆四三點散漁燈朝來露蓑長溼月下風  
檣不停

水色綠頭雄鴨舟形縮項鱖魚千點桃花拍岸春潮不  
過桐廬

挂劍謝臯羽墓插竿巖子陵壇身後哭餘兩友

此句屬謝生

前笑擲一官

此句屬巖

乍合乍開煙靄一重一掩霏微紫鱗出網能躍翠鳥踏

波亂飛

柳暗春旗古戍梅殘橫笛孤城留取三分花事老夫待

要山行

村鷄喚曙非一野鷺眠沙必雙時有飛星過水忽看苦

霧吞江

蘭溪九迴腸曲激水一指掌平鷺卵石多瀨淺魚鱗雲

起天晴

三百餘年婺學建文以後失傳重過四先生里白頭撫

卷愴然

余近抄宋元明初文集得金華前輩數家

門前二月楊柳屋後千年豫章村步稀栽杏樹鄰船時

遞蘭香

碓牀多沉新漲牛馬不辨兩涯遙見一灘白鷺近前知

是浪花

春分過後微雪上巳前頭嫩寒灘響吾愁減睡日長兒

勸加餐

時稚子隨行

太末城南最好橘林密帶甘林歲歲經秋克賦直從禹

貢到今

長亭七十有四川路縈紆倍艱安穩煙波六宿卸帆已  
到常山

一笈曾陪朱老浙西吟過江西誰憐磨牛陳跡自笑飛  
鴻雪泥

發常山早雨午晴二首

七日江程上水難肩輿差比布帆安朝來更覺山行好  
小雨纔過路便乾

麥畦菜壟黃兼綠李徑桃蹊白間紅著色春光誰畫得  
常山西畔玉山東

西江櫂歌詞四首

西下鄱陽總順流波聲汨汨櫂聲柔玉山城外唱歌去



三十三灘是信州

千尺長橋亘水隈商船到此盡眠桅索錢幸自無關吏  
滿載漳煙建紙來

黃牛引犢眠茅屋烏鬼隨人土竹牌共說此鄉魚米賤  
就中最賤莫如柴

兩頭舸子月纖纖愁雨愁風日日兼過客飽餐江右飯

居人貴買浙西鹽

江西十三郡惟  
廣信食浙鹽

樟樹鷺巢歌為施澗如明府作

鉛山縣署南城坳綠陰冬夏常相交豫章之材凡五樹  
上有鷺鷥來結巢東風二月高襟祀燕子來時歲相遇  
哺雛引子直經秋此是風標遺種處前者代嬪如高曾

後者相繼如雲仍雪衣飄然閱五世蝨斯蟄蟄還繩繩  
我讀東京循吏傳鴉變好音虎革面雀雛不探童子仁  
疇昔傳聞今眼見施侯到官踰兩年政成三異羣稱賢  
仁民及物物斯樂飛鳥依人人自憐此地昨曾經寇賊  
安集哀鴻繫誰力老夫重過十八年煙火居然万家邑  
佳辰召客開華筵葉鳧緱鶴同翩翩酒酣爲爾賦長句  
侯乎侯乎豈非仙

溥如招遊蓮華洞四首

夾路泉聲響珮環去城三里即名山清遊我正坐無事  
難得君侯如我閒

一綫天光落眼前洞門深入忽中穿欲知覺路隨方樂

憑仗西來一指禪

洞僻有石如佛指

興欲登高力已疲  
隨身可少杖扶持  
自憐濟勝全無具

頭步寧忘一蹶時

時余渡澗失足故云

兩家弟子生同異  
朱陸紛如聚訟來  
指點鷺湖榛莽路

講堂片席待重開

鷺湖山在縣北二十里君方議重修書院故及之

### 雨中度分水關

獨立千年石  
回看百丈溪  
浮雲自南北  
健水各東西  
俗吏憎書笈  
勞人信杖藜  
經過成熟路  
不怕鷓鴣啼

### 重遊武夷冲佑宮

十八年前夢披圖  
勝跡留万峯  
雲忽散九曲水  
仍流物外戀  
清境生涯回白頭  
短筇何負汝  
重作幔亭遊

陳道士房見甌寧蔡鉉升明府留題作詩寄之  
洞天三十六此洞自秦開羽士今寥落琳宮幾劫灰追  
游成昨夢得句憶仙才百里溪山近雙鳧早晚來

建溪權歌詞十二章

并序

朱子作武夷九曲權歌亦偶然寄興云爾其實九  
曲水淺曾不容舟余廣其意作建溪權歌詞可使  
扁郎唱艣而行俚語所不擇也

清流

名船

尾大腹仍皤杉板船輕一擲梭順水無風行更

穩槩聲如雁櫓如鷺

石根一道水滌洞真有腸如九曲迴問渡亭前齊閣權  
竹籬撐入武溪來

蘇東坡詩集卷四十四  
七  
不團小鳳不團龍細色如今免上供見說田家愁水旱  
好克茶戶莫爲農

西江估客建陽來不載蘭花與藥材點綴溪山真不俗  
麻沙村裏販書回

年年三月杜鵑啼紅白花開似錦溪只作湯山桃李看  
不知中有海棠梨

松栢難逃野火災忽教山色變成灰樵人比似猿猴捷  
絕壁無梯負擔回

不爭白狗黃牛峽不數西江廿四灘天下無如建溪惡  
水中刀劍是峯巒

北客南來飯好加川程三百少魚蝦建安腐乳甌寧酒

更有南鄉澤瀉花

連山苦竹賤如毛十節量成二丈高  
小泊南鴉南口子  
船船多換幾張篙

青天白日走雷霆黯澹危灘最有名  
掣電光中行十里  
船頭一轉即延平

自從舟發崇安縣直到洪塘與海通  
若使一灘高一丈  
幔亭合在半天中

生小離家慣水行濤波雖惡片篷輕  
不須阿囡呼郎罷  
但是同舟便有情

訪同年滿鳧山開府於三山官舍撫今懷昔賦

贈二章

宗臣久掌絲綸簿開府兼優政事科地是巖疆曾伏莽  
公來鯨海不揚波刑清訟簡神何暇望重官高氣轉和  
坐使八閩風一變挽回誰識苦心多

曾陪京兆鹿鳴筵共賦長楊羽獵篇聯轡三回經出塞  
下車一揖重同年當時霄漢依光近此日雲泥入望懸  
不是先生能念舊肯扶衰病到堦前

與劉海觀前輩話舊有感

三館當時數二劉後來誰不仰風流芝蘭臭味終相近  
縞紵交情幸見收自別道山虛接武每從宦海閱沉舟  
對君忍話京華事宿草鴿原痛未休

傷今兄若  
于先生也

尋道山亭故址

芒鞋布襪記曾經誰識蓬池舊謫星雙眼參差收七堦  
百年興廢閱孤亭雲煙繞閣山形秀浦漱通潮海氣腥  
好在南豐碑一統苔紋因雨洗猶青

九仙山平遠臺

跨鯉人遙片碣留居僧指點說丹丘平生不信神仙術  
垂老宜爲寂寞遊千里帆檣來域外九霄風雨過城頭  
劇憐野色亭西路好景多歸 萬歲樓

鳧山先生邀遊城東湯泉

万壑千峯赴海疆却從海眼發溫湯名同繡嶺寧愁污  
派別曹溪自有香身外塵埃供洗滌人間炎熱變清涼  
依然沂水風雩意童冠中間着老狂

時幕友沈林二生  
三公于俱在座兒



念亦  
侍行

老友林同人贈櫻竹杖

海山產異竹厥萌不常有移君軒墀前適用非適口一  
年長一寸寸累已久碧玉內堅剛櫻皮外粗醜尋丈  
經百年居然竹中叟金鴉劖作杖鉅細纜可手下有根  
生鬚上有葉垂筵故人憐我老分贈意良厚衰遲形影  
孤配爾如得偶嘉惠胡敢忘命之曰執友

留別前輩鄭老先生

此遊真到鄭公鄉許我重登佚老堂南極一星留碩果  
兩朝羣望屬靈光登山不用頻攜杖好客猶能遠置莊  
小吏相輕君勿怪浮雲閱盡是炎涼

先生時爲邑令所窘故云

留別林同人

結交逢老輩再見倍相親開口問前事聞聲知故人

林年

將八十目已喪明

衣冠非宿昔眠食尚精神洪浦通潮海毋辭

惠訊頻

唐書地理志侯官西南有洪塘浦自石罟江東經甓賣至柳橋以通舟楫即今之洪山橋也

住福州半月不及噉荔支而歸聞西禪寺老僧

癡賣尚無恙臨行口占寄之

果熟西禪寺朱

竹垞吳青壇

記竝嘗分甘紅計顆漬蜜白盈

筐一飽事難料獨遊神易傷居僧應笑我空到荔支鄉

建寧遇同年張蒿陸張由詞館改知松溪縣今

將移疾乞休詩以慰之

出宰松溪縣行踰報政期神清知善病藥賤苦無醫難

得音書便翻成邂逅奇引年猶未及莫負  
聖明時

武夷精舍

早時蒙養地晚節宦游途風雨一精舍溪山雙畫圖居  
常鄰道院交不廢緇徒識者觀其達何曾累大儒

武夷采茶詞四首

荔支花落別南鄉龍眼花開過建陽行近瀾滄東渡口  
滿山晴日焙茶香

時節初過穀雨天家家小竈起新煙山中一月閒人少  
不種沙田種石田

絕品從來不在多陰崖畢竟勝陽陂黃冠問我重來意

拄杖尋僧到竹窠

山茶產竹窠者爲上  
僧家所製遠勝道家

手摘都籃漫自誇曾蒙八餅賜  
天家酒狂去後詩名

在

用許嵒題  
詩岩事

留與山人唱采茶

崇安梅容山明府貽武夷山志

芒鞋三度入名山  
衰白重遊分已慳  
今日圖經落吾手  
巾箱攜得武夷還

朝發小漿村暮抵紫溪途中口號四首

引得層層樹杪泉  
高田瀉水及低田  
占城早稻移秧蚤  
四月村翁掠社錢

籃輿承蓋午風涼  
戲折山花插兩旁  
行處兒童齊拍手  
白頭老子擁紅粧

丹崖碧樹迴千霄  
行盡巖關百里遙  
日暮紫溪橋畔望

鷺鷥如雪點青苗

編茅樊竹作村莊  
樟樹花傳處處香  
漫說兩邦封壤接

狹鄉終不及寬鄉

寬鄉狹鄉出唐書食貨志

### 鉛山道中

龜趺埋沒泥沙底  
翁仲欹斜草棘間  
漸覺先朝餘澤遠  
耕牛犁到費家山

### 重至南昌感舊

官步門前柳拂頭  
早年曾作豫章遊  
兩朝文物多經眼  
千里江山復入舟  
宿草泪深懸榻地  
孤蹤分絕寄書郵  
篋中一卷西征集  
更與何人共唱酬

### 登滕王閣

高凌碧落俯層瀾老眼重開一大觀笑閱星霜如隔世

癸亥甲子間曾遊此閣今三十餘年矣閒思今古幾憑欄帆移雲影千山

動湖納江流万頃寬時江水暴漲丈餘沙洲皆沒校是詩翁無筆力

不留名姓避王韓

飲胡都閫德菴署中荷亭上二首

三十餘年話舊遊也曾投筆覓封侯邯鄲枕上夢初覺

一笑看成兩白頭庚申辛酉余客黔陽幕府胡時以武科從軍

柳外風來灑面涼雨餘三畝好池光借君酒盞勸君醉

莫負滿亭荷葉香主人善飲故戲云

端陽前二日遊北蘭寺四首時李暘谷挈榼小

飲列岫亭葉素我尊聞姪念兒俱在座

北蘭寺在沙城北旁置孤亭縹緲間碧樹陰交三面暗  
獨留一面對西山

彩旗畫鼓沸中流想像蛟龍畫出遊今日無人觀競渡

去年此地有沉舟

時當事嚴  
禁競渡

若將世法苦相繩何地能容世外僧來往風流今已矣

居人猶說宋中丞

傷老僧  
淡雪也

元氣茫茫散不收尊前聊記五人遊衰年未必能重到  
更爲斜陽作少留

李壻暘谷追送於滕王閣下臨發歸舟二章留

別

去便經年隔來爲半月留那無兒女戀偏動別離愁落

日當高閣清江帶小舟臨行一杯酒衰暮回頭

清德尚書後尤宜愛此身一村無兩姓宗伯公世居吉水之谷村聚族

至二千人八座有重親婿雙親俱早世而祖子出須斟酌吾

歸合隱淪相思還命駕後會豈無因

### 晚渡鄱陽湖夜泊瑞洪

黃梅連日雨濁浪入湖平沙柳曾邊沒霞天鳥外晴岼

容移晚景風色緊歸程忽報帆飛渡前村戍火明

行經貴溪縣赴同年王辰幟之招即席分韻

花草瓊林語於今十二年君方行縮綬我已賦歸田邑

有延賓館門停車酒船慙非徐孺子此榻為誰懸

### 廣信舟中望靈山



頑石四百里

自安仁至鉛山河口臨江山狀如覆盎草木不生

茲焉秀獨鍾翠

屏三十六不數九芙蓉

五月二十六日到家驚聞兒建京師訃信傷慘

而作七首

去歲夏四月兒來告行期我時卧在床汝去故遲遲我  
欲速汝出慰汝以好辭為言吾雖衰歲月尚可支銓除  
汝已及行且把一麾勿論地遠近三年望旋歸詎料凶  
問來哀哉甫及暮兒亡於四月九日此語恍如昨此情痛難追  
一家仕同朝出處分相謀父既罷官去子當偕歸休奈  
何復遣行夙疾况未瘳致汝道路死非汝命不猶為父  
實不仁自傷還自尤嗟嗟悔已晚餘憾徹九幽

延陵喪長子其驗服以時反服有苴麻童僕或未知倚  
賴者季父視汝猶視兒稍用慰老懷附身審所宜一棺  
隔江河魂氣無不之庶幾先入夢報我歸來期

祖宗二百年庭誥閑有家自汝為吾子勞少愛頗多粹  
質本性生不煩追琢加豈惟弛扑教抑且忘叱呵自從  
處庭幃迨試政事科所至靡失德後生可觀摩天若假  
以年成就當如何嗚呼今已矣家運薄則那

兒初宰東鹿律已慎以清 天子實嘉乃 綸褒為我

榮 癸未七月余隨 駕避暑口外一日 上遣內侍傳

諭云汝兒子在東鹿居官清慎朕已知道時同直  
諸君皆為 安溪賢相公謂汝性朴誠不讓古循吏行當

大家聲 今相國安溪李公時巡撫北直兒備員屬下極  
荷知愛嘗入南書房語余云郎君天性朴誠居

官廉潔大有循吏之風所到未可量也

生邀

君相知既沒保令名恩深

一未報改秩俄殞生

兒由知府

刑曹郎陞授鳳翔命下一月而沒

頭銜亦何

用聊可書銘旌

兒生乃冢孫及見祖考妣祖沒五十三兒齒十一矣兒  
亡四十八少祖五年耳家世孰高年吾今踰六紀人間  
愧爲父地下愧爲子孰與遊九京頽齡諒無幾  
向涉釋氏書死生委達觀乃復爲兒輩白頭作悲酸有  
情則有生生理斷故難親知苦相勸至痛非旁寬有時  
強自排觸緒仍万端神傷不在外老泪無多彈

敬業堂詩集卷四十四

敬業堂詩集卷四十五

海寧 查慎行 悔餘

吾過集

起乙未八月  
盡丙申四月

自聞建兒之訃三月無詩中秋後三日楊致軒太守偕令叔東崖施子自勗過慰流連信宿聊資觴咏排遣哀情夫喪明之戚賢者以爲規吾何人斯敢不知過乎

楊致軒偕諸子枉過敝廬

老抱延陵痛經秋只自悲感君攜伴至慰我斂眉時久別可無酒有情聊賦詩勿嫌芳草月今夜過牆遲

蠟奴歌

并序

敬業堂詩集卷四十五  
海中有小蟹寄居螺殼中兩螯四跪外向能行按  
本草蟹大如錢居蚌腹者螭奴也昌黎云入者主  
之出者奴之今乃以入者爲奴耶戲作歌索諸子  
和

介蟲三百有六十蟹族爬沙乃其一旁加八跪撐雙螯  
帶甲橫行風雨疾無端幻作腹居蟲竊食螭肉專其宮  
吾聞出者爲奴入者主主今安在奴稱雄吁嗟乎大魚  
噉多鰕鮒泣觸蠻蝸角爭方急鵲巢古亦有鳩居燕室  
終須防雀入

畚施自勗

才子生同邑陳人喜得朋每蒙詩見及祇覺愧難勝薄

俗餘孤賞虛懷去一矜好傳橫浦集彥質有雲仍宋施德操

字彥執吾邑人也與張子韶友善橫浦集中與彥執尺牘及唱酬詩甚多自勗豈其苗裔乎

八月晦日榆村季方曾三芝田諸兄弟偕過桂

堂小飲次芝田韻

夢裏悲歡覺者誰流光去我杳難追重尋老圃看花約

已失中秋坐月期委蛻子孫聊自解時榆村兄有塲孫之戚在原

兄弟詎勝思余時適聞德尹病風辭免之信達觀至竟談何易除却銜

杯百不宜

第六孫生

東吳方喪子次息又添孫歌哭於斯室興衰視此門家

貧寧計口客至且浮尊敢料成童日吾猶月告存

聞德尹患風疾將上章乞休寄懷二首

道遠傳書少年侵感事多忽聞君末疾轉益我沉痾家  
運衰如此朝恩重若何勿將身試藥時世少醫和

食新吾自幸屈指又三年偕隱原初約當歸那問天婢  
牽蘿補屋奴縛草為船慙愧分甘意寬心及目前大兒身後

多官通弟許分結  
茅之資以慰余懷

重陽後一日季方兄招同諸兄弟龍尾登高

眾船昨夢隔漁洋柁杖相攜又故鄉海蜃浮空呈寶刹  
石龍渡水得殘岡嘉禾野潤初收雨綠樹村濃未剪霜  
愛惜眼光留足力年年來此作重陽

題龍尾山僧舍

龍形蜿蜒三四里起伏雉尻露顛趾秦鞭怒爾屹不移

鑿斷其腰曳其尾龍腰俗傳秦始皇所鑿何年一掉鱗甲摧蛻骨

化石凝堅胚山僧負土補石縫長養松竹從嬰孩駢青

聳翠皈佛力鎮以精監高岌岌鼉鳴鯨吼海外聞樵唱

漁謳月中入回首茫茫禹九州茲山奚啻一浮漚蘭單

合是疲牛路老矣猶能賦近遊東廣微近遊賦駕蘭單之疲牛

### 朱乾若輓詩二章

名高無顯晦業富有淵源家自傳閩學身嘗到孔門兄

出紫陽曾設教於行聖公家荒榛誰與闢碩果幸猶存豈意龍蛇厄

頻傷好弟昆與三子懷兩兄十年來先後俱下世故云

白頭歸已晚索莫感離羣昨歲猶過我今朝又哭君恍



疑神理接不謂死生分孰是辭無愧來題有道墳

衍齋惠香櫟戲答二絕句

磊落筠籠五十枚清香分供佛前來敢同賣菜還求益  
待覓根株自接栽

也擬堦前種一枝老人作計太迂遲心知證果非難事  
眼見開花是幾時

偶過雨梧齋看菊別後得二十韻寄主人楊致

軒

貧家無菊看一棹訪城隈且喜經霜在非關冒雨來秋  
光如我待病眼爲渠開百本紛成列千頭疊作堆枝枝  
疑竝蒂朶朶儼重臺倚賴扶身竹因依帶土苔淺深微

別色高下悉呈材，涼蝶窺簾度。慵蜂拂檻回，差堪登瓦  
缶。直可勸金罍，花及兼旬賞。根須隔歲培，相逢雖解后  
臨別尚徘徊，預作東籬計。分苗手自栽。

訪陳侍御梅溪郊外新居二首

見說新居好，幽尋不待招。年豐禾被坂，潦退水平橋。改  
路侵桑柘，爲鄰傍緯蕭。涼風吹白帔，來問郭西樵。  
海氣孤村外，秋聲萬木間。名方高洛社，夢不點朝班。閱  
世隨流水，安身比太山。傲他軒冕貴，投老遂長閒。

座主宗伯許公再邀楊晚研陳宋齋梅溪及余  
爲五老之會席上分賦二章時立冬後四日

又作名園三日留，欸門人各有扁舟。宵能縱酒晨還醉。

晴便登山雨即休且喜大家添一歲未應高興減前遊  
黃花已老丹楓嫩斟酌初冬勝晚秋

勿論雪北與香南谷水東西亦有庵行處人言星聚五

序來吾忝齒居三緇黃世外關存沒是遠上人仍入坐南山張道士已下

世風月尊前助笑談錯料詩成如噉蔗後來居上得無

慙晚研梅溪兩家令子俱從遊詩又先成故戲云

### 牆根冬菊

直自陳芟發何煩客土移近根除蝨葉藉草出卑枝點  
綴荒蕪徑支撐缺壞籬栽培初少力敢怨作花遲

### 禾稼初收野眺作

窮鄉十年九旱潦嘉種歉歉蕃庶草秋來雨幸不成災

安慰人情眼前好溪南  
祀稬百頃田縱橫蚱蜢飛連天  
黃雲捲盡霜野濶放眼直到南山邊  
新春家家催相杵  
倚杖閒聽鄰叟語偶然村社飽雞豚  
久矣官倉肥雀鼠  
題杜集後二首  
此老原非諫爭姿許身稷契復奚疑  
可憐官馬還官後  
徒步歸猶號拾遺  
漂泊西南且未還  
幾曾蒿目委時艱  
三重茅底牀牀漏  
突兀胸中屋萬間

讀莊子內篇八首

世人耳目隘直與蜩鳩鄰  
焉知天地間乃有鵬與鯤  
小窺大不盡大視小不倫  
吾遊非彼適彼笑非吾聞

彼此一是非有一斯有万於中強分別間不能以寸齊  
之以不齊兩俱置勿問方將與物化何有乎物論

其意在詆儒其說乃近仙其源發乎老其漸流爲禪養  
生徒養形木寇膏自煎是形無不盡薪盡而火傳

死生非二理出入同一機人皆有故鄉弱喪昏不知千  
載旦暮遇淵明悟其微南山舊宅在逆旅終當歸

生本玩世人初未忘用世觀其審出處亦重君臣義用  
世必以言忠言或取戾所以遁天刑寧甘爲世棄

人人兩其足恥與兀者徒向非德內克有足不啻無外  
形而形全內神而神腴形神兩皆寓是謂內外符

讀書自得師深淺隨所到當其快領會何異朝聞道勞

生佚以老反覆覺語妙妙處老方知毋輕示年少  
耆欲必有開聰明出乎鑿自從渾沌死天下無純樸帝  
王遞相嬗泰氏不可作世運日趨澆滔滔緊誰覺

十一月初七夜紀事

未年建子月村舍宵喧逐老夫衣服冠起坐中心摧女  
媧石破碎猛雨噴空來風勢助靚靚電光走焯焯孤陽  
五陰下七鬯吁可哀復其見天心奮地乃出雷我欲祝  
雷公馳聲徧九垓毋徒震百里齟齬驚童孩又欲禱風  
伯非時掃氛霾明兩日重光天門誅蕩開五行有常變  
數以反覆推孰者主張是瑞或生於灾世運視斡旋人  
情仰昭回露生亦何事蟄戶行復培

庭卉具萎手除枯莖

條蔓天生弱况兼冰霰加過時多悴物經眼即空華芒  
刺除三逕蒸薪共一車但看枯穢盡何種不萌芽

兒建歸櫬權厝西阡

自得淮南信輻歸報有期遠慙羸博葬近慰首丘思魂  
魄孫隨祖冰霜父哭兒一號臯某復望絕倚門時

閱邸報北直學使交替有人知德尹歸期不遠  
矣作詩志喜四首

冬來日日望迴輪邸報遙傳信漸真客病也應資藥餌  
長途未可恃精神官隨年限纔經臘

弟於去冬赴任農  
及是僅滿一年

告歸期正及春勞動里中羊酒賀一家遂有兩閒人

王介

甫詩有豈容家有  
兩閒人之句故云

舊莊喬木蔭茅茨六十餘年黍一炊  
卅角光陰雙鬢改  
釣遊踪跡兩心知  
交頭對倚花前杖  
歛手閒看劫外棋  
見說漢廷偏愛老申公  
免病故遲遲

盛事依稀記玉堂  
後先出入總  
恩光魚潛樂莫如同

隊雁序歸仍不亂  
行忍便析居  
違丙舍尚煩刻碣表  
瀧岡經耒績火原  
家法相戒兒孫勿去鄉

長虞晚節相從少  
豈料歸期不約同  
弟今年六十四與  
余引疾之歲恰同

架有圖書延客座  
堂無絲竹變鄉風  
桑榆賸飽溫暾味  
梨棗粗收長養功  
校勝蘓家好兄弟  
對牀來作白頭翁

蠟梅宋以前未有賦者  
東坡山谷后山少游始



見於吟詠率皆古體而不入律王平甫陸務觀  
尤延之楊誠齋各有五七言律詩方虛谷瀛奎  
律髓選附梅花類中雪窗披覽頗不愜意適友  
人折贈此花信手拈筆非敢與前賢較工拙也  
閱盡嘉平臘來爲最晚芳冰心含淺紫雪瓣吐嬌黃後  
菊偏同色先梅別有香百花多釀蜜容爾占蜂房

過德尹城中新居十二韻

再得歸田一紙書喜於身自挂冠初城隅別儻三間屋  
戶外高懸四望車飽閱官情知進退好還天道任盈虛  
豈惟太息傳供帳頗覺謹聲動里閭應接稍防生客擾  
往來寧慮舊交疎囊衣事偶同王吉襆被人應諒魏舒

世上名皆身以外曆頭冬是歲之餘巢成古樹寒依鵲  
檻俯清池夕數魚膝下諸雛看漸長燈前二老笑相於  
小時至性君猶在病起精神我不如良夜且爲無事飲  
明年仍擬故林居園廬早晚梅花發已遣家童預掃除  
雪後次東坡韻二首

繞屋聞聲已散鴉到門無逕可停車雲端海日峰峰玉  
畫裏山村樹樹花酒上衰顏聊遣興詩經白戰自成家  
梁園賦客爭工拙未抵先生手一義

亦知天色朝來好不奈風威分外嚴笑拍屨屨供爨蠟  
戲搏師虎作形鹽晴綿未拆猶鋪逕冰筍俄長欲墮檐  
最是瓷盆先得氣蘭芽已放兩三尖

丙申二月雨雪連縣援筆排悶

巡檐倚杖步蹒跚  
村巷泥深欲出難  
二月風光三日雪  
閏年天氣半春寒  
蟻浮竹葉杯常凍  
雀啣苔枝蕊未殘  
好笑纖兒羣擲瓦  
不聞古井復生瀾

積翠樓古栢恭次座主宗伯公原韻二章

不知移植是何峯  
拔地今成天矯龍  
左紐紋應儕老檜

後凋名許配高松  
霜柯蔭合烏呈瑞  
長公立岩時官侍御香葉年

深鹿絕蹤獨貫四時無  
改易自天雨露正濃濃

蒼髯翠甲映于思  
不染人間半點埃  
自倚孤根堅鐵石

對抽雙幹出樓臺  
陶家門外新栽柳  
王氏庭前手植槐

何似先生扶正直  
少陵古栢行扶持自是神明力正直原因造化功階庭成就

栢梁材

盆中鴛鴦梅戲次許東垞韻

兩般顏色接栽餘

香山詩樹接兩般花

磁斗交花密復疎秦虢一

門承寵日尹邢雙美入宮初淡粧濃抹休相妬傅粉施丹恐不如未免孤山高士笑笑他倚市又克廬

蚍蜉

大盜盜魯藏小盜盜墓木蚍蜉肯自量蜂蠆反余毒本根葛藟庇保已分良足此外何不容坦而示之腹

二月杪偕諸兄弟西阡看梅集句

安得健步移遠梅健如黃犢走復來春花不愁不爛熳

只恐花盡老相催

集杜

又一首

兩岸山花似雪開劉夢一杯一杯復一杯李太白勸君更

盡一杯酒王摩詰二月已破三月來杜子美

三月三日塘西卓氏園看梅

兩月春苦寒閉門雨雪中名園一昔到天氣初和融徐

步盡深榛窅然苔逕通中有古梅樹閱人自兒童余年十三

四時讀書西水曾遊此園今五十餘年矣花開子孫枝樹亦成老翁不知幾

易王孤幹如焦銅良辰與我期噴雪當晴空清香襲襟

袂澹若松下風夕陽墮林西纖月張虛弓慙將塵土足

移入笙歌叢是夕沈氏叔姪置酒演劇故云

雨後玉蘭未殘適德尹自武原歸再飲其下此

樹弟手植者

不負春來約新晴果到家手栽當檻樹眼見出牆花比

雪偏能艷

韋蘇州詩清詩舞艷雪

如瑜不掩瑕兩翁心竊喜何啻

茁蘭芽

雨點着花瓣俱成黑斑故有第六句

馬衍齋筮易得漸二爻既以名其居復繪小影

坐磐石旁竹垞老人舊書于磐二字今以圖來

索題附綴數語義盡於卦無取旁求也

離于干即于磐起居無時惟石之安止以為巽兮木因

乎山于陵于陸兮抑豈鴻之所難

三年前手植牡丹閏月始花吟成八韻

爛燭三年約參差五尺叢稍遲因閏月最後領春工密

葉深流翠狂苞怒發紅扶頭香與力登頰酒無功日出  
光相射煙含態轉融憐渠風雨後慰我寂寥中臺榭移  
難定笙歌賞易終不如離色界長伴白頭翁

大雨枕上作

雷雨軒窗動孤燈耿夜深老人渾不寐大有惜花心

閏三月十一日拙宜園牡丹之期時晚研將赴

密雲城工兼以送別四首

臨事從容意於君見一斑開園仍郭內置酒且花間世  
已難希古天應未許閒寧聞白賓客垂老出香山

不道桑麻社中間有路岐幾時重會合此別各衰遲官  
罷貧誰諒身存病敢辭隨翁心似鐵難得好男兒

東坡  
送子

由北使詩隨翁萬里心如鐵自注猶子遲也今令子次也侍行故及之

草野聞朝議籌邊事不同鑿山甌脫外設險塞垣中路  
指屯雲戍城連避暑宮河湟方用武勝策轉漕功  
林下拋雙屐風前換短衣重為遠行役只望蚤旋歸王  
事程期迫京華故舊稀莫令招隱地歲晚寸心違

### 腰痛自嘲

平生恥折腰疆直詭自訟謂從解組後帶眼稍寬縱寧  
知患苦纏百衲鬪一縫向來所受病及是方覺痛養生論以

覺痛之日為受病之始也

欠伸兩不遂轉側需僕從抓搔性復慵摩

拊亦安用可憐血肉軀猥與蟣蟲共人間十萬貫騎鶴  
嫌腰重痛定吾有時身輕行試鳳東坡詩身輕可試雲間鳳



苦雨歎

十日五日雨脚稠皇天害物肯待秋

左傳秋無苦雨服虔注云害物之雨

民所

苦野花委地不如草林鵲置巢全為鳩雌蛟蝶飛何

處去官蝦蟇叫無時休南山朝躋東海溢一老書空方

坐愁

海塘歎

沙崩岬塌風駕潮潮頭勢與城爭高愚公移山或可障

精衛填石誠徒勞海若東來神鬼泣尾閭南泄魚龍逃

邑興大役官乏費行矣板築湏時操

力役之征紳士無得免者少陵云板

築不時操今日之謂歟

蠶麥歎

寫鹵之地成梢溝

水漱齧者為梢溝出周禮注

傾都委貨爛不收

姑尚以蠶命月野老曾於麥望秋恤緯孰是織室者雜

耕吾亦農家流縣符蚤晚急夏稅何暇更為百草憂

黃涪

翁云男女墮地衣食各有分齊安能感額為百草憂春雨耶

### 復愁四章

今年陰太盛四月雨尤狂渡口浮橋斷門前暴漲黃坐

看千頃没立致一村荒歎息昂頭麥抽芽比穗長

二麥垂熟

而未登芒穗中發芽長寸許目所未睹也

頓遣蒸薪貴難教米價低溼炊煙冒瓦罷汲井封泥俗

累生誰免身謀老自迷藜床經月卧拄杖不輕攜

古井長防塌先廬且幸存沉沉移白日耿耿向黃昏

敬業堂詩集卷四十五  
三  
穴乘甄縫蝸涎上漏痕此中無客到何用掩蓬門  
箕畢占頻驗庚壬候總非鄰雞鳴不已梁燕乳相依賦  
肯憐蛙瘦人方羨鼠肥樂郊何處所舍此我安歸

敬業堂詩集卷四十五